

La carta de San Pablo a los Romanos

Roma cuto gãnare Pablo ï papera cõare gaye

¹ Ñati Roma gãna mua. Yu ña Pablo, adi muare papera cõagũ. Jesucristore moa ïsiri masu ña yu. Yure besecõri Cristo oca masare yu goti ucutoni yure cũni Dios. “No Jesucristore tuorũnugũre ïre masogũ yiguĩji Dios”, yi masare yu goti ucutoni yure cũni Dios.

² Jane mejeju, “Ado bajiro masare queno ejabuagu yigũja yu”, yirocu iti oca goti yucãyiju Dios. ï gotiado bajiroti ï ocare uca rotiyiju ïre goti ïsiri masare. Ito bajiri iti oca quenarise uca warã ï oca tuti ucayijarã ña. ³ Iti oca Jesucristo gaye manire riasoa. Ñti ñami Dios Macu, mani Uju. Adi sitaju masu rujuna rujeayiju ï. Ito yicõri David ñayoru janerãbatia janamiti ñayiju Jesucristo. ⁴ Ito bajibo jaguti Dios Macuti ñayiju Jesucristo. ï godaja bero Espiritu Santo ï masirisena, ïre mucana tũdi ï catiroca yiyiju. Itire masicõri, “Dios Macuti ñami Jesucristo”, yi tuoia mani ïja.

⁵ Jesucristona suoriti queno yiñi Dios yure. Masa jeyaro Jesure ña tuorũnutoni, ito yicõri yiro robo ña cuditoni, yure cũni Dios. Ito bajiri, “Rẽtoro quenagũ ñami Dios”, yi ïre rucubworã yirãji masa. ⁶ Muare cuni beseñi Dios. Jesucristo ñarã mua ñatoni, muare beseñi ï. ⁷ Mua Roma gãna ñarocõreti adi papera cõa yu. Buto maiami Dios muare. ï ñarã mua ñatoni muare beseñi Dios. Mani Jacu Dios ito yicõri Jesucristo mani Uju muare queno yijaro. Ito yicõri mua ya usiju queno mua wanu quenaroca yijaro ña.

Roma cuto gãnare Pablo ï ti ãmore gaye

⁸ Ado bajiro muare gotisuoá yu. Co cuto ruyabeto mua Jesure tuorũnũre gayere muare busisotiamá masa jeyaro. Ito bajiro ña yija tuocõri, “Queno ya Dios mu”, ya yu. Ito bajiro Diore busia yu, Jesús yure ñ ejabuarisena. ⁹ Coji ruyabeto Diore yu busija, muare yiari busisotia yu. Buto yu tuoĩarise ñarocõnati ñ yiro robo Diore cudia yu. Ñre yiro robo cudigu, ñ Macu Jesús oca masare goti ucua yu. “Roma gãnare yiari yure senisotiami Pablo”, yi masiguĩji Dios yure. ¹⁰ Diore yu busija ito bajiro senisotia yu. Ñ amoja mua tũju co rũmu ejabogũja yu, yirocu ito bajiro senisotia yu. Yoari mua tu warocu tuoĩasotiboja yu. ¹¹ Dios gayere muare riaso amoá yu, yure ñ ejabuado bajiro muare cuni ñ ejabuatoní. Ito bajiro muare ñ ejabuaja, ñ ocare masicõri buto busa tuoĩa oca seõrã yirãji mua. Ito bajiri buto muare ti amoá yu. ¹² Jesucristore tuorũnrã ña mani. Ito bajiri mua tu ejacõri mua rãca baba cuti amoá yu. “Queno Jesure tuorũnũama ña”, yi muare ti masicõri tuoĩa oca seõgũ yigũja yu. Mua cuni ito bajiroti yu rãca gãmeri busicõri tuoĩa oca seõrã yirãji.

¹³ Mua tuo masitoni adi muare gotia, yu mairã yu. Coji ruyabeto mua tũju wa ãmosotiboja yu. Yoari mua tũju wa ãmobjaguti, iti rũmũju mua tũju eja masibiticu yu maji. Gaje cuto gãnare yu riasoroca Jesure boca ãmiñi ña. Mua bajiroti judio masa meje ñarã ñacã ña cuni. Mua tu ñarã cuni Jesure ña masitoni ejabuagu wa ãmosotia yu mua tũju. Ito bajibojarocati mua tũju ejabiticu yu maji. ¹⁴ Masa jeyarore riasore ña yure, Dios oca quenarise gayere. Yu ya moare ña, yu oca busirãre riosore, ito yicõri yu oca busimenare cuni riasore gaye. Masirãre cuni riasogu yigũja yu, ito yicõri masimenare cuni. ¹⁵ Ito bajicõri Romaju ejacõri, mua tu gãnare cuni Jesús gaye oca quenarise riaso ãmosacõa yu.

Jesucristo oca ñasarise ña, yire gaye

¹⁶ Iti oca masa ñna tuorũnũja, jeameju ñna uabore ñaroca, ñnare masoguĩji Dios. Iti oca judio masare riti ejasuooyija maji. Ito bajibojarocati adocãtama no itire tuorũnũgũreti masogũ yiguĩji Dios ñja. Ito bajiri itire masicõri, Jesús gayere bojobicuti gotia yu. ¹⁷ Ado bajiro ña iti oca: “Jesure mani tuorũnũja, manire boca ãmicõri, ‘Queno yirã ñama. Ñe seti ma ñnare’, yiguĩji Dios. Ado bajiro ucare ñayija jane mejeju gaye: No Diore tuorũnũgũre, ñre boca ãmigũ yiguĩji Dios. ‘Ñe seti ma ñre’, yi tigũ yiguĩji Dios ñre tuorũnũgũre. Ito bajiri catitĩnãgũ yiguĩji ñ”, yi gotia Dios oca tuti.

Masa jeyaro seti cutirã ñama, yire gaye

¹⁸ Ado bajiro ña. Dios macãrucũroju ñagũ, masa ñna ñeñaro yirise, ñna riojo cudibitire cani, itire buto ti teguĩji Dios. Ito bajiro ñna ñeñaro yija, Dios oca quenarisere gãjerã ñna tuobitiroca yirãji ñna. Itire junisinicõri buto teguĩji Dios. ¹⁹ “Ito bajiro bajigu ñnãguĩji Dios”, yi masi jedirãji masa. Ñmasiti ito bajiro ñna masiroca yiñi Dios. “Ñeñaro yu yire waja quenabeto yu tõbujaroca yigu yiguĩji Dios”, yi masi jedirãji masa. ²⁰ Diore tibitibojarãti, “Buto masigũ ñami Dios”, yi tuoña mani. Dios mani masiroca yami, ito bajigu ñari. Macãrucũro ñ rujeorajũju, jeyaro ñ rujeore gaye ticõri, “Ito bajigu ñami Dios. Iti ña ñ rujeogore”, yi masirãji masa jeyaro. Ito bajiri, “¿No bajigu ñati Dios? ñre ti bujabea yu. Ito bajiri yure seti ma”, yi masia ma masare. ²¹ “Ito bajigu ñami Dios”, yi masibojarãti, Diore queno rucububobisjarã masa. Ito yicõri, “Queno ya mu”, yire gaye yibisjarã ñre. Ado bajirojuã yiyijarã ñna. Rocati bajiro, tuoñabojayijarã masa. Ñeñarise riti ñna tuoña rãtocũja, quenarise ñna tuoñabojare gayere ãcabojayija ñnare. Ito bajiro bajirã ñari rãitĩari usi bajiro usi cutiyijarã ñna. ²² “Buto masirã ña gũ”, yibojayijarã

ĩna. Ito yibojarãti masimena ñayijarã ĩna. ²³ Ito bajiro tuoõabojarãti, Dios catitĩñagũre queno rũcũbuobisijarã ĩna. Gajero bajirojua yiyijarã ĩna. Masũ jogaroti ruju robo bajiro meni rujeocõri rũcũbuobojayijarã ĩna. Wutirãre, jinnoare, ito yicõri waibũcu bajirãre cuni rũcũbuobojayijarã ĩna.

²⁴ Itire ñeñarise gayere ĩna rũcũbuoja, “Yibesa”, yibisiju Dios. Riojoti ticõayiju ĩja. “Ĩna ãmoro bajicõato”, yiyiju Dios ĩnare. Ito bajiri ĩnamasiti ĩna ya ruju ñeñaro iti tuoõaro bajiroti ñeñaro yi uyayijarã ĩna. Ito bajiro yicõri ĩnamasiti gãmeri ñeñaro yiyijarã ĩna. ²⁵ Dios oca ñasarisere tuorũnubiticõri, ruore ocajuare tuorũnyijarã ĩna. Diore rũcũbuoado õno yirã, Dios ĩ menire gayejũare rũcũbuoyijarã masa. “Dise ruayabeto rujeoru ña Dios mũ. Mũ ña rëtoro queno yigu”, yi rũcũbuotĩñacõruja manire. Ito bajiro riti bajitĩñaja quena.

²⁶ “Ĩna ñeñaro yirisere jidicã ãmobeama”, yi masicõri masare ticõayiju Dios ĩja. Romiajua cuni, ãmua rãca ĩna yibojarere jidicãcõri, ĩna romia comasiti yiyijarã ĩna ĩja. ²⁷ Ito bajiroti ãmua cuni, romia rãca ĩna yibojarere wasoyijarã ĩna. Ito bajiri, ĩna ãmua comasiti, ruje josayijarã ĩna ĩja. Ito bajiri ĩna ãmua comasiti ñeñarise yiyijarã ĩna. Ito bajiri ñeñaro ĩna yirisere ĩna ya ruju masiti quenabisiju ĩnare.

²⁸ Diore ĩna tuo ãmobitiado bajiroti, ñeñarise ĩna yijare, “Yibesa mũa”, yibisiju Dios. Riojoti ticõayiju. “Ĩna ãmoro bajicõato”, yiyiju Dios. Ito bajiri ĩna yi ãmoriseti ñeñaro yiyijarã ĩna ĩja. ²⁹ Jeyaro ñeñarise, yi uyarã ñama masa. Jeyaro ñeñarise yirãji ĩna. Ado bajiro baja. Tuote mũa. Dios rotirisere tuo tecõri buto ñeñarise yirãji ĩna. Gãji ya gajeoni ãmotirã yirãji ĩna. Gãjire ñeñaro yirona tuoõarã yirãji ĩna. Gãji jai busaro ĩ rucoja, ĩre uorãji ĩna. Sïarãji ĩna. Gãmeri oca josarãji ĩna. Ito yicõri rocati socarãji

ĩna. Ti tudirã yirãji ĩna. Gãjerãre oca menirã yirãji ĩna.
³⁰ Bũsiturãji ĩna. Diore ti terãji ĩna. Junisiorise cãdirã
 yirãji ĩna. “Ñasagu ña yu”, yi tuoĩarã yirãji ĩna. “Bũto
 masigũ ña yu”, yi bũsirãji ĩna. Ñeñarisere yirã, bũto tuoĩa
 rujeorã yirãji ĩna. ĩna jacũsabatiare yiro robo cãdimenaji
 ĩna. ³¹ Tũo masimena ñarã yirãji ĩna. ĩna bũsisũoado
 bajiro yimenaji ĩna. Ito yicõri gãjerãre ti maimenaji ĩna.
 Gãjerã ñeñaro ĩna yirisere, ãcabojomenaji ĩna. ³² “Ito
 bajiro ñeñaro yirãre jeame ãjũroju cõacũja yu”, yicãñi
 Dios, yi tuoĩabojarãti ñeñaro ĩna yirisere jidicã ãmomenaji
 ĩna. Iti ñeñarise yi yuacõrã yirãji ĩna. Ito yicõri ĩna
 robo bajiro gãjerã cũni ñeñaro ĩna yija ticõri, bũto wanũrã
 yirãji. “Quena ña iti”, yi tirã yirãji ĩna.

2

Masa ñeñaro ĩna yiado bajiroti waja senigũ yiguĩji Dios, yire gaye

¹ Gãjerãre ti masicõri, “Ĩna ñama ñeñaro yirã”, yibesa.
 ĩna robo bajiroti ñeñarise ya mũa cũni. Ito bajiri, “Seti
 ma guare”, yi masia ma mũare. “Ĩnare seti ña”, mũa
 yija, “Yũre cũni seti ña”, yiado bajiro ya mũa. ĩna yiro
 bajiroti ya mũa cũni. ² Ñeñaro yirã ñabojarãti, “Ĩna ñama
 ñeñaro yirã”, mũa yija, mũare cũni waja senigũ yiguĩji
 Dios. Masa jeyaro ñeñaro ĩna yirise waja, Dios ĩ senija,
 yiro robo yigu ñami Dios. “Riti baja ite”, yi masi jedia
 mani. ³ ĩna robo ñeñaro yirã ñabojarãti, “Ĩnare seti ña”,
 mũa yija, ĩna robo bajiro ñeñaro yirãti ya mũa cũni.
 “Dios mani ñeñaro yirise waja, manire waja senibiquĩji”,
 yi tuoĩabojarãji mũa. Ito bajiro yi tuoĩabojarocati mũa
 ñeñaro yirise waja mũare waja senigũ yiguĩji Dios. ⁴ Mũa
 ñeñaro yibojarocati, mũa ñeñaro yirise waja senirocũ
 ʘsiriobiquĩji Dios. ¿Ito bajiri, “Yũre waja senibiquĩji”, yi
 tuoĩabojati mũa? Ito bajiro meje baja. Manire ti maicõri,

mani ñeñaro yirise waja, waja senirocũ usirio yibiquĩji Dios. Ñeñaro yirise mani jidicãre ãmoami ĩ. Itire mani jidicãtoni yugũ yami Dios. ⁵ Diore tuo ãmobeã mua. Ito bajiri ñeñaro mua yirisere tuoĩa bojori bujabiticõri itire jidicãbeã mua maji. Buto busã ñeñarise mua yi rëtocũja, buto ñeñarise mua tõbujaroca yigũ yiguĩji Dios. Ito bajiro ĩ yija ticõri, “Yiro robo yigũ ñami Dios”, yi masi jedirã yirãji masa jeyaro. ⁶ Masa jeyarore ñeñaro ĩna yirise waja ĩnare waja senigũ yiguĩji Dios. Ito yicõri quenaro yigoanare, queno yigũ yiguĩji ĩ. ⁷ “Yũ Macũre tuorũnucõri queno yirã ña mua. Ito bajiri yũ rãca catitĩñarã yirãji mua”, Dios ĩ yire tuo ãmorã, quenarise riti yisotirãji ĩna. Ito bajiro ĩna yija ticõri, ĩnare catitĩñare gaye ĩsigũ yiguĩji Dios. ⁸ Gãjerãma ito bajirã meje ñarãji. Gãjerãre tuo maibiticõri ĩna rucorisere buto mairãji ĩna. Ito yicõri Dios oca quenarise tuorũnumena, ñeñarise yi uyarãji ĩna. Ito bajiro ĩna yija buto ti junisinicõri, ĩnare waja senigũ yiguĩji Dios. ⁹ Ñeñaro yirã jeyaro buto tuoĩa bujatobiticõri ñeñaro tõbujarã yirãji ĩna. Cajero judio masa ñeñaro ĩna yirise waja tõbujasũorã yirãji ĩna. Judio masa meje cuni ito bajiroti ñeñaro ĩna yirise waja tõbujarã yirãji ĩna. ¹⁰ Gãjerã quenaro yigoanareama, “Quenaro yirã ñaĩ”, yigũ yiguĩji Dios. Ito bajiri ĩnareama gãjerã rucũbuorã yirãji. Ito yicõri ñe usiriobeto ñarã yirãji ĩna. ĩna ya usijũ queno wanũ quenarã yirãji ĩna. Ito bajiro, bajiro yiroja judio masare, ito yicõri judio masa mejere cuni, Jesucristore tuorũnucõri quenarise riti ĩna yijama.

¹¹ Mani yi ñasotigore ticõri, manire bese masigũ yiguĩji Dios. Judio masa, judio masa mejere cuni coro bajiroti ti maiguĩji Dios. ¹² Masa jeyaro ñeñaro yirãji ĩna. Coriarã Dios ĩ rotirisere masimenati ñeñaro yirãji ĩna. ĩna ñeñaro yija, ĩna ñeñaro yirise waja, waja senigũ yiguĩji Dios, ĩ rotirisere masimena ñabojarocati. Gãjerãma Dios ĩ rotiris-

ere masirã ñabojarãti, ñeñarise yirãji ñna. Ito bajiri ñna cüdibitire waja, ñnare waja senigũ yiguĩji Dios. ¹³ Ñ rotirise tũbojarãti ñna cüdibeja, “Queno yirã ñnama”, yibiquĩji Dios. “Quenarã ñnama ñna”, yiguĩji Dios, ñ rotirise yiro robo cüdirãreama. ¹⁴ Judio masa meje cüni, Dios ñ rotirisere masibitibojarãti, coriajuri quenarise yisotirãji ñna. Ito bajiro ñna yisotija, Dios rotirise ucara tuti manibojarocati, ñna masirisena Dios rotirise ña ñnare. ¹⁵ Ñna rücubeogore ticõri, “Ñna masirisena Dios ñ rotirise ña ñnare”, yi tuoia mani. Ñeñaro ñna yija, yoari meje, “Ñeñaro ya yu”, yirãji ñna, ñna masirisena. “¿No yija ñeñaro yati yu?” yi tuoiarãji ñna. Quenarise ñna yija, “Quenarise yibũ yu”, yi masirãji ñna. ¹⁶ Mani tuoiarisere masicãguĩji Jesucristo. Ito yicõri yeyoroju mani yibojarisere masicõguĩji ñ. Ito bajiri Dios, Jesure waja senitoni ñ cõari rãmũ, masa quenarãre bese masigũ yiguĩji Jesús. Ñ oca quenarise mũare yu riasoja, ito bajiroti iti oca mũare riasoa yu.

Moisés rotirisere cüdirã ñnari Dios ñnarã ñna gua, judio masa ñna yire gaye

¹⁷ Ado bajiro tuoibojarãji judio masa mũa: “Judio masa ñnari Moisés ñayorũre Dios ñ rotirise ñ cüre rücubeoa gua. Ito bajiri Dios ñnarã ñna gua”, yi tuoibojarãji mũa. ¹⁸ Dios ñ yiro robo yire gayere masirãji mũa. “Dios ñ rotirise masicõri, quenarisere yi masia gua”, yirãji mũa. ¹⁹ Mũa itire tuoiarã, “Dios gaye masimenare riaso masia gua”, yi tuoiarãji mũa. “Ñeñaro yirãre quenarise gaye riaso masia gua”, yi tuoiarãji mũa. ²⁰ “Tuo masimenare, ito yicõri rĩaca bajiro tuoiarãre cüni riaso masia gua”, yi tuoiarãji mũa. “Dios rotirise masicõri, jeyaro ñasarise masia gua”, yi tuoibojarãji mũa. ²¹ Gãjerãre queno riasobojarãti, ¿no yija ñnare mũa riasoado bajiroti yibeati mũa? “Rinire, quenarise gaye meje ñna”, yi riasobojarãti,

¿no yija muamasiti riniati mua? ²² “Manojo cutibojarāti, gājerāre yire meje ñaroja”, yibojarāti, ¿no yija muamasiti itire yati mua? Masa ña meni rujeorare ti tebojarāti, ¿no yija iti wi gaye gajeoni riniati mua? ²³ “Dios ñ rotirisere masia gua”, yibojarāti, ñre cudibea mua. Diore cudimena ñari, ñre rucubworā meje ña mua. Ito bajiro mua yija ticōri, gājerā cuni Diore rucubwomona yirāji ña. ²⁴ Dios oca gotirise bajiro baja muare. Ado bajiro goti iti: “Judio masa ñabojarāti, Dios rotirise gayere cudibea mua. Mua ito bajija ti masicōri, judio masa meje cuni Diore ñeñaro busituama ña. Ito bajiri muare seti ña”, yi gotia Dios oca tuti.

²⁵ “Dios ñarā ña gua”, yi tuoīacōri pī gaja wirotasotirāji judio masa. “Diore mua cudija ñ ñarā ñarāji mua”, ya ya. Ito bajibojarocati, wirotagoana ñabojarāti Diore mua cudibeja ñ ñarā meje ña mua. ²⁶ No Dios rotirisere cudiguti, wirotaya macu ñabojaguti, “Yu yagu ñami ñ”, yigu yiguji Dios. ²⁷ Mua judio masa Dios rotirise ucara tutire rucorā ñabojarāti, ito yicōri wirotagoana ñabojarāti Diore cudibea mua. Coriarā judio masa meje ñarā, wirotamena ñabojarāti Dios ñ rotirisere cudirā ñama ña. Ito bajiro ña yija ticōri, “Dios ñ tiro riojo ñeñaro yirā ña gua”, yi tuoīarā yirāji mua. ²⁸ Judio masu goro ñ ñarise muare gotigu ya ya. Sigū wirotaru ñabojaguti Diore rucubwobicu, judio masu goro meje ñami ñocū. ²⁹ No Dios bajiro usi cutigu, ito yicōri Dios ñ rotirise yiro robo cudigu judio masu goro ñaguji ñocū. Judio masa bajiro wirotacōacōri, ñ ñeñaro yirisere jidicāgū yiguji ñ. Ito bajiro bajigu ñaguji Dios rotirisere yiro robo cudigu. Ito bajiro bajigure, “Quenagū ñami. Ñe seti ma ñre”, yiguji Dios. Masa ña, “Quenagū ñami”, ña yibitibojarocati, “Quenagū ñami”, yiguji Dioama.

3

¹ Itire tuoċōri, ¿no bajiro tuoĩati mua? Judio masu ñaja, ¿ñasagu ñare ñati? wiro tare gaye, ¿ina yiado bajiro yija quenati? “Judio masu ña yu”, ¿sīgũ ĩ yija quenati? ¿No yibeati? ² “Judio masu ña yu”, ĩ yi tuoĩaja quena ña. Jaje gotirena suoriti judio masu ñasagu ñare ña. Cajero goroama judio masare ĩ oca cōaņi Dios. ³ ĩ oca rŭcubuojojarāti judio masa coriarā Diore yiro robo ĩna cŭdibeja, ¿no bajirojada? Yiro robo Dios rotirise ĩna yibitibojarocati Dioama yiro robo yigu ñami. “Ĭ yiro robo yibiquĩji Dios”, ĩna yi tuoĩaja, ¿ĩ yiro robo yibiquĩjida Dios? ⁴ Meje, bajibea. Ĭ yiro robo yisotigu yiguĩji Dios. Masa jeyaro ĩna socabojarocati, Dioama socagu meje ñami. Jane mejeju Diore goti ĩsiri masu ado bajiro ucayoņi:

Dios mu ña coji ruyabeto yiro robo yigu. “Ado bajiro yicuja yu”, mu yiro bajiroti ya mu. Ito bajigu mu ñajare, “Diore seti ña”, yi masimenaji masa. “Socagu meje ñami Dios”, yi masi jedirā yirāji masa jeyaro, yi ucayoņi Diore goti ĩsiri masu.

⁵ Coriarā ado bajiro tuoĩabojarāji: “Buto ñeņarise yu yi rētocūja ticōri, ‘Dios sīgũti ñami quenagũ’, yi tuoĩarā yirāji gājerā”, yi tuoĩabojama coriarā. Ito bajiro tuoĩacōri, “Ñeņaro yu yirise waja, waja Dios ĩ senija, ñeņaro yiguĩji ĩ cuni”, yi tuoĩabojarāji coriarā. ⁶ Ito bajiro meje ña. Masa ĩna ñeņaro ĩna yirise waja Dios ĩ senija, ñeņaro yigu meje yami Dios. Ñeņarise ma Diore. Ito bajiri masa jeyarore, ñeņaro ĩna yirise waja seni masiguĩji Dios.

⁷ Gajero bajirojua tuoĩabojarāji masa: “Yu ruoja ticōri, ‘Ruogu meje ñami Dios’, yi rŭcubworā yirāji gājerā. Ito bajiri, ¿no yija yu ruojati yure waja seniati Dios?” yi tuoĩabojarāji coriarā. ⁸ “Ñeņaro mani yija ticōri, ‘Dios sīgũti ñami queno yigu’, yi rŭcubworā yirāji gājerā. Ito bajiri ñeņaro yito mani”, yi tuoĩabojarāji coriarā. Gware

masa tuorũnume yirona, “Ito bajiroti ruore gaye riasoama Pablo mesa cuni”, yi ruoama gãjerã guare. Ito ñna yire waja, quenabeto ñna tũbujaroca yirujami Dios.

Mani ñarocõti seti cutirã ña, yire gaye

⁹ ¿No bajiro tuoĩati mua? Mani judio masa, ¿gãjerã rêto busaro ñasari masa bajiro bajiati mani? Ñena sũori bajibea mani. Mani judio masa, judio masa meje ñarã cuni, seti cutirã riti ña mani. Ito bajiro riti masare riasocu ya. ¹⁰ Dios oca tuti ado bajiro gotia:

Sĩgũ quena busagu maquĩji.

¹¹ Ñimujua tuoĩa masigũ maquĩji, ito yicõri Dios robo bajiro usi cuti ãmogũ maquĩji.

¹² Masa jeyaro Dios oca quenarisere jidicãñi, ito yicõri ñeñarise riti yirãji. Nijua sigũ quenarise yigu maquĩji.

¹³ Ñna ya riseri, masari cuma janado bajiro bajiroja. Ñna busija masari cuma ñniro bajiro bajiroja, ruore oca riti ñna busija. Ñna busija, ãña rima robo bajiro junirise budiroja, ñna ya oca.

¹⁴ Gãjerãre busiturã, oca junisiorise busiturã ñarãji ñna. Ito bajiro yicõri gãjerãre rojarã yirãji ñna.

¹⁵ Rocati tuoĩamenati, gãjire sãrãji ñna.

¹⁶ Ñna waroju ñeñarise yirãji ñna. Ñeñaro yicõri, gãjerã bujato mano ñna tũbujaroca yirãji ñna.

¹⁷ Gãjerã rãca queno ñare gaye ña masimenaji ñna.

¹⁸ “Sẽogũ ñami Dios”, yi tuoĩabojarãti, ñre rucubũomenaji ñna, yi gotia Dios oca tuti.

¹⁹ Dios ñ rotirise gaye, mani judio masare cũni, ñ rotirise ere mani cuditoni. Dios ñ rotirise masibojarãti, itire mani yibeja, “Yũre seti ma”, yi masimenaji mani. Ito bajiri, “Masa jeyarore ñna ñeñaro yirise waja, waja senigũ yiguĩji Dios”, yi tuoĩa mani. ²⁰ Nijua sigũ maquĩji, “Dios ñ rotirise ñarocõti cudi jeoa ya”, yi tuoĩagũ. Ito bajiri, “Queno yigu

ña mu', yigu yiguñji Dios yure", yi tuoñagũ maquñji. Dios ã rotirise masicõri, "Ñeñaro yigu ña yu", yi masi jedia mani ãja.

Jesucristore mani tuorũnũja ticõri, manire masogũ yiguñji Dios, yire gaye

²¹ "Yu rotirisere masibitibojarãti queno yirã ñama yure tuorũnũrã. Ñe seti ma ñnare", yi gotiami Dios adi rumari ãja. Jane mejeju cuni ito bajiroti gotistuoyija ã rotirise, ãre goti ãsiri masa ñna ucare cuni. ²² "No Jesucristore tuorũnũgũ, ã ñami quenagũ", yigu yiguñji Dios. Judio masa, judio masa meje cuni Jesucristore ñna tuorũnũja ticõri, coro bajiroti ti maiguñji Dios. ²³ Mani jeyaro ñeñarise yiana riti ña mani. Ñimujua maquñji, Dios ã ãmorise yigu. ²⁴ Ito bajibojarocati manire ti maiguñji Dios. Jesure mani tuorũnũja, "Yure waja ruyuriobeama ñna, ñna ñeñaro yirise waja yi jeocõñi yu Macu", yigu yiguñji Dios. ²⁵ Dios cõayiju Jesucristore, manire ã goda ãsitoni. Mani rucubure rãca, "Ñeñaro yu yirisere waja yi ãsiñi Jesús ã ya rina", mani yija, mani ñeñaro yirisere ãcabojogu yiguñji Dios. Iti masicõri, "Yiro bajiroti yigu ñami Dios", yi tuoña mani. Jane mejeju masa ñna ñeñaro yirisere waja seni usirio yibisiju Dios. "Ñna ñeñaro yirise waja goda ãsigũ yiguñji yu Macu", yire gaye masi yucãyiju Dios. ²⁶ Ito bajiro rẽtayija, "Yiro robo yigu ñami Dios", mani yitoni. No Jesure tuorũnũgãreti, "Queno yigu ñami", yigu yiguñji Dios, ñeñaro mani yirise Jesús ã waja yija bero ñajare.

²⁷ "Queno yigu ña yu", Dios ã tiro riojo yi masibeamani. Adocãta Dios rotirise yiro robo mani cudija, "Queno yigu ña yu", ¿yi masiati mani? Meje itioni yi masimenaji mani. Itire mani yi masibitibojarocati Jesure mani tuorũnũja, "Queno yirã ñama", yi tiguñji Dios manire. ²⁸ Dios rotirise mani cudi ãmorã josabojarocati, "Queno yirã ñama", yibiquñji Dios. Ito bajibojarocati, "Yu ñeñaro yirisere waja

yi ĩsiñi Jesús”, mani yi tuoñaja, “Ĩna ñama quenarã”, yigu yiguñji Dios.

²⁹ Mani judio masa Uju riti meje ñaguñji Dios. Judio masa mejere cuni ĩna Ujuti ñami Dios. ³⁰ Ito bajiri sigũ ñabojaguti masa jeyaro Uju ñami Dios. Ito bajiri sigũ judio masu, Jesure ĩ tuorũnaja ticõri, “Quenagũ ñami”, yigu yiguñji Dios. Ito yicõri judio masu meje cuni Jesure ĩ tuorũnaja ticõri, “Ĩ ñami quenagũ”, yigu yiguñji Dios. Wirowo mani tabeja, wirowo mani taja cuni ñasarise meje ña Dios ĩ tija. ³¹ Itire tuoñacõri, ¿Dios ĩ rotirise jidicãrujati mani? No yicõri jidicãmenaji mani. Mani Jesure tuorũnrã buto busa Dios ĩ rotirisere cudirã yirãji mani.

4

Ado bajiro bajiyju Abraham ñayoru, yire gaye

¹ Mani ñicu Abraham ñayorure tuoñacõri, ¿no bajiro yi tuoñati mani? Ito yicõri, ¿no bajiro ĩ yija ticõri, ĩre boca ãmiyijari Dios? ² Queno ĩ yirise ticõri, ¿ĩre boca ãmiyijari Dios? Ito bajiro meje ña. Ito bajiro bajijama, “Queno yigu ña yu”, yiboru Abraham. Dios ĩ tiro riojo, “Queno yigu ña yu”, yi tuoñabisiju Abraham. ³ Dios oca ado bajirojua gotia: “Abraham Diore queno tuorũnyiju. Ito bajiri, ‘Queno yigu ñami’, yi boca ãmiyiju Dios Abrahamre”, yi gotia Dios oca. ⁴ Ado bajiro muare goti masiogũ ya yu. Sigũ ĩ moaja, ĩre moare rotigũ rocati meje waja yiguñji ĩ. ĩ moare ticõri waja yiguñji ĩ. ⁵ Diore tuorũnare gayeama, ito bajiro meje baja. ĩre tuorũnrãre queno boca ãmiguñji Dios. ĩna queno yire waja, waja yirocu meje ĩnare boca ãmigũ yiguñji Dios. ĩre ĩna tuorũnjure, ĩnare boca ãmigũ yiguñji Dios. ĩre ĩna tuorũnaja ticõri, “Queno yirã ñama”, yigu yiguñji Dios. ĩna queno yire waja, waja yirocu meje ito bajiro yigu yiguñji Dios. ĩre ĩna tuorũnjure, ĩnare boca ãmigũ yiguñji

Dios. ⁶ Itire tuoĩagũ David ñayoru cuni ado bajiro yiyiju: “Jeyaro ñna yigore tuoĩabicuti, ‘Queno yirã ñama. Ñe seti ma ñnare’, yigu yiguĩji Dios ñre tuorũnarãre. Ito bajiro Dios ñnare ñ boca ãmija, wanu quenarã yirãji ñna”, yiyiju David ñayoru. “Wanu quenarã yirãji”, yirocu, ⁷ ado bajiro yiyiju David:

Ñeñaro ñna yirisere Dios ñ ãcabojoja, ito yicõri iti ñeñarisere ñ ruyurioja bero queno wanu quenarã yirãji ñna.

⁸ No ñeñaro ñ yirisere waja Dios ñ senibeja, queno wanu quenagũ ñaguĩji, yiyiju David ñayoru.

⁹ Iti wanu quenare, judio masa wirotagoana gaye riti meje ñaroja iti. Judio masa meje ñarã cuni wirotabitobjarãti Diore ñna tuorũnuja wanu quenarã yirãji. Abraham ñayorure mucana tũdi tuoĩate muu. “Yure tuorũnugũ ñami Abraham”, yi ticõri, “Queno yigu ñami ñ. Ñe seti ma ñre”, yiyiju Dios. ¹⁰ Dios ito bajiro ñ yija, ¿Abraham ñ wirotaja bero ñayijari? Ito bajirojua meje bajiyija. Abraham ñ wirotaroto riojua, “Queno yigu ñami Abraham”, yiyiju Dios. ¹¹ Abraham ñ tuorũnuja ticõri, “Queno yigu ñami”, yi ñre boca ãmiyiju Dios. ñre ñ boca ãmija berojua ñre wirotarotiyiju Dios. “Riti Dios yagu ña yu”, yi tuoĩacõri, Dios ñ rotiado bajiro yigu wirotayiju Abraham ñayoru. Ito bajiri Abrahamre ñ wirotarotiroto riojua, “Queno yigu ñami Abraham”, yiyiju Dios, yi tuoĩa masia mani. No Diore tuorũnugũ, judio masu meje ñabojaguti, wirotacoru meje ñabojaguti, “ñ ñami quenagũ”, yigu yiguĩji Dios. Dios ñ boca ãmiana, Abraham janerãbatia robo bajiro bajirã ñarãji ñna ñja. ¹² Wirotagoana ñicu cuni ñaguĩji Abraham. Wirotarotariojua Diore tuorũnyiju Abraham. Wirotarajuna suori meje ñna ñicu ñaguĩji Abraham. ñ robo bajiro, Diore ñna tuorũnũjare, judio masa ñicu ñaguĩji Abraham. Judio masa ñicu ñaguĩji ñ. Judio masa ñna

ñare waja meje, Diore ñna tuorũnũre waja judio masa ñicu ñaguĩji Abraham. Ito bajiri Abraham robo bajiro Diore tuorũnũrã, ã janerãbatia robo bajirã ñarãji ñna.

Jesure mani tuorũnũja Dios ã goticãdo bajiroti rãtaru yiroja, yire gaye

¹³ Jane mejeju ado bajiro goticãyiju Dios Abrahamre: “Macãrucãro sita ñarocõti mũre, mũ janerãbatiare cuni ãsigũ yigũja yũ”, yiyiju Dios. Ito bajiro gotiyiju Dios Abrahamre ã rotirisere yiro robo ã cãdija ticõri meje. “Yũre tuorũnũcõri, queno yigu ñami Abraham”, yi tuoĩacõri ito bajiro cũyiju Dios Abrahamre. ¹⁴ “Dios ã rotirisere gũa cãdire waja, ‘Ado bajiro masare ãsicũja yũ’, ã yiro bajiroti gũare ãsigũ yiguĩji Dios”, yi tuoĩabojama coriarã. ãre tuorũnũmenareti ã rotirise ñna cãdire waja Dios ã ãsija ãre tuorũnũbojarã ya mani. Ito yicõri, “Yũre tuorũnũrãre ado bajiro ãsicũja yũ”, yi Dios ã goticãre buruotĩ bajiro baja itĩ cuni. ¹⁵ Ito bajiro meje ñna. “ã rotirisere masibojarãti ñna cãdibeja ticõri, ñnare junisinigũ yiguĩji Dios”, yi tuoĩa mani. Dios ã rotirise manija, “Dios ã rotirisere cãdibeama masa”, yi masibitiboana mani.

¹⁶ Abrahamre ti maicõri, “Yũre mũ tuorũnũja, rocati waja mano mũre ãsigũ yigũja yũ”, yiyiju Dios Abrahamre. Mani Diore tuorũnũja, mani ñicu bajiro bajigu ñaguĩji Abraham. Ito bajiri Dios rotirise cãdirã riti meje, Abrahamre Dios ã goticãre boca ãmirã yirãji ñna. No Abraham robo bajiro Diore tuorũnũrã Dios ã goticãre boca ãmirã yirãji ñna. ¹⁷ Dios Abrahamre ã goticãdo bajiroti, ucare ñayiju jane mejejutĩ. Ado bajiro bajiyiju: “Jaje sitari gãna ñicu ñarocũ mũre cũa yũ”, yiyiju Dios Abraham ñayorũre. Ito bajiro Dios ã yija tuocõri, ã gotiro bajiroti rũcũbũoyiju Abraham. Ito bajiri mani ñicu ñarocũ cũyiju

Dios Abrahamre. Sēogũ ñami Dios. Īti ñami godanare catiroca yigũ, ito yicōri jeyaro rujeoru.

¹⁸ “Mu janerābatia jājarā ñarā yirāji”, Abrahamre Dios ĩ yiroca, rĩa macũ ñayijũ Abraham maji. “Dios ĩ gotire, rētarō yiroja”, yi tũoĩa ñayijũ Abraham, rĩa manibojaguti. ¹⁹ Abraham cien roboricō tujabojaguti, ito yicōri ĩ manojo Sara, bũco ñabojarocati, “Rĩa macũja yũ”, yibisijũ Abraham. Bũcũgũ rĩa cũtiado macũ ñabojaguti, “Ija rĩa cũtibicũja yũ”, yi tũoĩabisijũ ĩ. “Dios ĩ gotirise riti ña”, yi tũoĩa jidicābisijũ Abraham. ²⁰ “Dios ĩ gotirise ñaro bajiroti rētarō yiroja”, yi tũoĩayijũ Abraham. “Ī gotiado bajiro yibicũ yiguĩji Dios”, yire gaye tũoĩabisijũ Abraham. Ito bajiri bũto busa tũoĩa oca sēocōri, “Ī rotiado bajiroti yigũ yiguĩji Dios”, yi tũoĩayijũ ĩ. Ito bajiro tũoĩacōri, “Rētoro masigũ ñami Dios”, yi rũcũbuoyijũ Abraham, Diore tũorũnũgũ. ²¹ “Dios bũto masigũ ĩ ñajare, ĩ goticādo bajiroti yigũ yiguĩji”, yi tũoĩasotiyijũ Abraham. ²² Ito bajiro ĩ yija ticōri, “Queno yũre tũorũnũgũ ñami Abraham, ito yicōri queno yigũ ñami ĩ”, yiyijũ Dios. Ito bajiro gotia Dios oca tuti.

²³ Abraham ĩ sīgũre yiari meje ucare ñayija iti. ²⁴ Manire yiari cũni ucare ñayija iti. Diore mani tũorũnũja manire boca āmicōri, “Quenarā ñama ĩna. Ñe seti ma ĩnare”, yigũ yiguĩji Dios. Ī Dioti ñami, mani Hju Jesure, ĩ godaroca mũcana tũdi ĩ catiroca yirũ. ²⁵ Mani ñeñaro yirise ñarocōti waja yi jeorocũ godaņi Jesús. Ī godaja bero mũcana tũdi catiņi, “Ñe waja ruyuriobeama ĩna. Queno yirā ñama ĩna”, Dios ĩ yitoni.

5

Jesure mani tũorũnũja ñe seti mana ña mani, yire gaye

¹ Jesure mani tũorũnũja, “Īna ñama quenarā. Yũre waja ruyuriobeama ĩna”, yigũ boca āmiguĩji Dios manire.

Ñarocõreti quenoyijũ Jesús. Ito bajiri Dios rãca queno ñare gaye ña manire. ² Jesure mani tuorũnũja, manire ti maicõri manire masogũ yiguĩji Dios. Ito bajiri ãre tuorũnũcõri queno wanũrãji mani. “Rẽtoro quenagũ ñami Dios. Ì quenaro yirise manire yiari jidicãgũ yiguĩji ì”, yi wanũ quenarãji mani. ³ Iti gaye riti meje wanũ quenarãji mani. Mani ñeñaro tõbũjaborarijũ cuni wanũcõrãji mani. “Ñeñaro yũ tõbũjaborajaja cuni Jesure masicõri bũto bũsa tuoĩa oca sãogũ yigũja yũ”, yi tuoĩa mani. ⁴ Ito bajiro mani bajija ticõri, “Queno yũre tuorũnũrã ñama ñna”, yigũ yiguĩji Dios. Ito bajiro Dios ì yija, “Yũre masogũ yiguĩji”, yi tuoĩa yucãrãji mani. ⁵ Ito bajiro tuoĩa yucõri, bojori bũjare gayere bũjamenaji mani. “Dios manire masogũ yiguĩji”, yi tuoĩacõa mani. Manire bũto maiami Dios. Ito bajiri manire Espĩritu Santore queo sãni Dios. Espĩritu Santo mani rãca ñ natĩñajare, “Yũre maiami Dios”, yi tuoĩa mani ñja.

⁶ Ñeñaro mani yirise mani jidicã masibeto, ito yicõri, “No yi masia ma yũre”, mani yi tuoĩaroca, itocõ Dios ãmoro bajiro ejayija, Cristo manire ì goda ñsirijũ. ⁷ Sĩgũ queno yigũ ñabobarocati, ãre goda ñsigũ queno maquĩji. Sĩgũ queno yigũ ãre goda ñsigũ ñaguĩji gajea. ⁸ Cristoama mani ñeñaro yirã ñabobarocati, manire goda ñsiñi ñ. Ito bajiri, “Manire bũto maiami Dios”, yi tuoĩa masia mani. ⁹ Jesús mani ñeñaro yirise waja, ñ ya rĩna waja yi godañi. Ito bajiri itire ticõri, “Yũre waja ruyuriobearna ñna. Ñe seti ma ñnare ñja”, yiguĩji Dios manire. “Yũre yiari busigũ yiguĩji Cristo. Ito bajiri, yũre junisinibicũ, ñeñaro yũ tõbũjaroca yibicũ yiguĩji Dios”, yi tuoĩa masia mani. ¹⁰ Diore mani wajacũ cutibobarocati maji, manire yiari goda ñsiñi Cristo. Ito bajiro yĩni ñ, Dios rãca mani queno ñatoni. Dios rãca queno mani ñaroca, adocãta Jesús mũcana caticõri queno bũsa manire yigũ yiguĩji. Jeame ãjũrojũ mani

wabore ñaroca, manire masogũ yiguĩji Jesús. ¹¹ “Jeame ñjuroju wabore gaye manire masogũ yiguĩji”, yirona buto wanurãji mani. Ito yicõri, “Yũ ñarã ñama. Ñe seti ma ñnare”, yigũ yiguĩji Dios. Ito bajiro yiguĩji Dios, mani Uju Jesucristo manire ã goda ñsire ñajare.

Cristo ito yicõri Adán ñayoru ñna bajire gaye

¹² Dios ã cajero rujeosũoru ã ñayiju Adán wame cutigu. Ñ cajero ñeñarise yisũoyiju. Ñ ñeñaro yisũorajuna, jeyaro macãrucũro gãna ñeñaro yisũoyijarã. Ito yicõri godasũoyijarã ñna. Mani ñeñarise yirã ñari, goda jedirã yirãji mani jeyaro. ¹³ Dios ã rotirise, Moisésre ã jidicãroto riojua, masa ñeñarise yicãnajũ ñayijarã ñja. Ñeñaro ñna yibojarocati, Dios ã rotirise manijare maji, “Yũ rotirisere tũorũnũbeama ñna”, yibisiju Dios maji. ¹⁴ Dios ã rotirise manijare, ñeñaro yiyijarã masa. Adán ã ñaratũajũ, ito yicõri Moisés ã ñarajũju cuni, ito bajiroti bajicõyiju. Ito bajiri goda jedicoayijarã ñna ñarocõti. Ñna ñeñaro yire, Adán ã Diore cudibitire gaye bajiro meje yiyijarã ñna. Adãnti ñayiju cajero ñeñarise yire gayere mũocõari masũ. Mani ã bero gãna jeyaro ñeñaro yirã riti ña. Manire ticõri, “Ñeñaro yirã riti ñama”, yiguĩji Dios. Ito bajibojarocati Adán ã ñaja bero yoari sũgũ ã robo bajiro bajigũ meje quenarise riti yigũ ñayiju. Ñ ñayiju Jesucristo. Ñ ñayiju cajero Dios rotirise cudi jeogũ. Mani ñeñaro yirise waja ã waja yi ñsirena sũoriti, “Yũre waja ruyuriobeama. Ñe seti ma ñnare ñja”, yi tisũoyiju Dios manire.

¹⁵ Adán ñeñaro ã yigore, ito yicõri Dios manire queno ã yigore rãca babo masia ma. Masare Dios ã ti mairise, iti ñna buto busa quenarise. Adán sũgũ ñabojaguti ñeñaro ã yirajuna sũoriti masa jãjarã godayijarã. Dioama manire ti maicõri, Jesucristore cõañi manire ã goda ñsitoni. Jesús sũgũ ñabojaguti jãjarãre jeameju mũboanare masoyiju ã.

Ito yicōri Jesús ĩ sĭgũti manire ti maicōri, waja senibicũ yiguĩji ĩ. Īama mani catitĩñaroca yigũ yiguĩji. ¹⁶ Dios manire ĩ queno yigore ito yicōri Adán ĩ ñeñaro yigore rāca babo masia ma. Adán sĭgũ ĩ ñabojarocati ñeñaro ĩ yisũore ticōri, “Masa jeyaro ñeñaro ĩna yirise waja tōbũjarā yirāji ĩna”, yiyijũ Dios. Ito bajibojarocati, masare ti maicōri, Jesure cōañi Dios, masare ĩ goda ĩsitoni. Ito bajiri ĩre mani tuorũnũja, ñeñaro mani yirisere ācabojogũ yiguĩji Dios. Ito bajiri ñeñaro yirā mani ñabojarocati, “Queno yirā ñama. Ñe seti ma ĩnare”, yigũ yiguĩji Dios. ¹⁷ Adán sĭgũ ñabojaguti, ĩ ñeñaro yijare, masa jeyaro godarā yirāji. Ito bajibojarocati Jesús manire ĩ goda ĩsirena suoriti mani ñeñaro yirisere ācabojogũ yiguĩji Dios. Ito yicōri manire ti maicōri, “Quenarā ñama ĩna. Ūmacũjũ yũ Macũ Jesucristo rāca catitĩnarā yirāji ĩna”, yigũ yiguĩji Dios.

¹⁸ Adán sĭgũ ñabojaguti, ñeñaro ĩ yijare masa jeyaro ĩna tōbũjaroca yigũ yiguĩji Dios. Ito bajibojarocati Jesús sĭgũ ñabojaguti queno ĩ yijare, “Ñeñaro yũ yirisere itire ācabojoya Dios mũ”, yi masirāji masa jeyaro. Ito bajiro ĩna yi rũcubũoja tuocōri, “Quena ñama. Catitĩnarā yirāji”, yigũ yiguĩji Dios. ¹⁹ Dios ĩ rotiro bajiro cũdibisijũ Adán. Adán sĭgũ ñabojaguti, ito bajiro ĩ yija, jājarā masa ñeñaro yisũoyjarā ĩja. Ito bajibojarocati, Jesuama ñaro bajiroti cũdiyijũ Diore. Ito bajiro ĩ yija jājarā masa ñeñaro ĩna yirise Dios ĩ cōa ĩsigoana ñama ĩja. Ito bajiri, “Queno yirā ñama”, yicōri ĩnare boca āmigũ yiguĩji Dios.

²⁰ Dios ĩ rotirise jidicāñi Moisésre, “Ñeñaro yirā ña gũ”, mani yi tuoña jeditoni. Ñeñaro mani yibojarocati, “Dioama buto busa manire ti maiguĩji”, yi tuoña mani ĩja. ²¹ Mani ñarocōreti ñeñaro mani yirise waja seti ña. Ito bajiri ñarocōti godarā yirāji mani ĩja. Ito bajibojarocati Dioama manire ti maiguĩji. Dios manire ti maicōri, Jesucristo mani Ūjũre cōañi, ñeñarise jeyaro ĩ quenotoni.

Ito bajiri Dios manire ti maicōri, “Queno yirã ñama ña”, yicōri, manire boca ãmigũ yiguĩji. Ito bajiri catitĩñarã yirãji mani ñja.

6

Ñeñarise jidicãna ñari Cristona suoriti catitĩñarã yirãji mani, yire gaye

¹ Itire masicōri, ¿ñere yirũja, yi tuoñati mua adocãta? ¿Ñeñaro yirejũare yitĩñarũjati manire, Dios ñ mairise bũto busa manire ñ ñotoni? ² Ñena suori yimenaji mani. Ñeñarisere jidicãgoana ña mani. Ito bajiri mani Cristo ñarã ñabojarãti, ¿ñeñarise yi uyarãjida mani? Meje ñeñarise yi uyaamenaji mani. ³ ¿Idé gure gayere tuo masiati mua? Idé gu roticũ mani, “Cristo ñarã ñama”, gãjerã ña yi ti masitoni. Riti ñ ñarã ña mani ñja. Ito bajiri Cristo ñ godacãre ñajare, ñ robo bajiroti godacãna ña mani cuni. ⁴ Mani idé gucatijũ, Cristo rãca yuje cũado bajiro bajicũ mani. Cristo ñ godaja bero mucana tũdi ñ catiroca yiyijũ mani Jacũ Dios ñ masirisena. Mani ñeñaro yirise jidicãtoni ito bajiro yiyijũ Dios. Ito yicōri quenarise mani yitoni, ñ masirisena manire ejabũagũ yiguĩji Dios.

⁵ Cristo ñarã mani ñaja, ñ godarajũ ñ robo bajiro godana ña mani cuni. Ito yicōri ñ ñarã mani ñaja, mucana tũdi ñ catiado bajiroti, mani cuni tũdi caticōri ñ rãca catitĩñarã yirãji. ⁶ Cristo yucutẽojũ ñ godado bajiroti, mani ñeñaro yi ãmorise godayija. Ito bajiri ñeñaro yi ãmorã meje ña mani ñja. Ñeñaro mani yi ãmorisere jidicã masia mani. Ito bajiri ñeñarise yi uyaamenaji mani ñja. ⁷ Masa godarã, ñeñaro ña yibeto bajiro mani cuni ñeñaro yi uyaamenaji. ⁸ Ñeñarise jidicãgoana mani ñaja, Cristo rãca godacãna robo bajiro baja mani. Ito bajiri, “Ñ tũdi catiado bajiroti, mani cuni tũdi catirã yirãji”, ya mani. ⁹ “Godabojagũti mucana tũdi ñ catiroca yiyijũ Dios Cristore. Mucana tũdi

juaji godabiquiji Cristo”, yi tuoia mani. Mucana tudi juaji godare manoja ire. ¹⁰ Cristo cojiti godani, mani ñeñaro yirisere cōagũ. Mucana tudi caticōri, Dios i amoro bajiro yi ñagũ ñami i ija. ¹¹ Ito bajiro tuoiaruja manire cuni. “Yu ñeñaro yirisere jidicacōri tudi itire yi uyabicuja yu mucana. Cristo yagu ñacōri, Dios i amoro bajiro yi ñagũ yiguja yu”, yiruja manire.

¹² Natĩñaroti meje ña mani ya rujũ. Ito bajiri mua ya rujũ ñeñaro iti tuoiaro bajiroti ñeñaro yi uyabesa. Buto ñeñarise yiroto amobojarocati ñemecutiruja manire. ¹³ Mua ya rujũ ñeñaro iti tuoiaro bajiroti ñeñaro yibitiruja muare. Mua ña, jeame ujuroju mua wabore ñaroca Jesús i masogoana. Ito bajiri Dios i amoro bajiro riti mua ya rujuna quenarise riti mua yitĩñaja quena. ¹⁴ Ire cudirã mani ñaja, ñeñarise yire gaye amobeto yiroja manire. “Dios i rotirisere yu cudibeja, jeameju yure cōagũ yiguĩji”, yi tuoia güirã meje ña mani. “Jesure yu tuorũnaja, yure ti maicōri, yure masogũ yiguĩji Dios”, yi tuoia wanurã ña mani.

Ñeñarise riti mani yi uyaja mani Uju robo bajirise ña, yire gaye

¹⁵ “Dios i rotirisere yu cudibeja, jeame ujuroju yure cōagũ yiguĩji i”, yi tuoia güicōri, ñeñarise yibitiruja manire. “Yure ti maicōri, yure masogũ yiguĩji Dios”, yi tuoiarã ñari, Dios i amoro bajiro riti cudiruja manire. ¹⁶ Gãjire mua tuorũnaja, i ñaguĩji mua ujũ. Ito yicōri ire moa isiri masa ñarãji mua. Ito bajiro ñeñarise riti mua yi uyaja, mua ujũ robo bajiro tujaroja ñeñarise ija. Ito bajiro ñeñarise mua yija, ñeñarise jidicã masimenaji mua. Ito bajiro mua yija, jeame ujuroju warã yirãji mua. Ito bajibojarocati, Diore mua tuorũnaja, “Queno yirã ñama. Seti ma ñare”, yigu yiguĩji Dios. Itire masirãji mua. ¹⁷ Iti rumujũ, ñeñarise mua yija, mua ujũ robo bajiro

bajiyija ñeñarise. Ito bajiri ñeñarise yi uyayija mua maji. Adocātama Dios ocare riasoticōri itire cūdia mua. Ito bajiri ñe rūcubuoṛā ña mua ĩja. Iti masicōri, “Queno ya Dios mu”, ya yu ñe. ¹⁸ Ñeñaro yire gaye cūdirā meje ña mua ĩja. Diore cūdirā ñari quenarise riti yi āmorā ña mua ĩja. ¹⁹ Queno cōīa gotire rāca muare goticu yu, queno mua tuo masitoni. Iti rumuju buto ñeñarise yirā ñayija mua maji. Adocātama quenarise riti mua yi ñaja quena. Quenarise riti mua yija, Dios ĩ āmorise yirā yirāji mua.

²⁰ Iti rumuju ñeñarise riti yirā ñari quenarisere yibisija mua maji. Dios ĩ āmoro bajiro yirā meje ñayija mua maji. ²¹ Itijumu, ñeñarise mua yirajumu, ĩ ñeoni quenarise bujacati mua? Bujabisija mua. Adocāta, iti rumuju ñeñarise mua yigore, mua tuoīaja, bojoriseti baja ĩja. No ñeñarise riti yirā, ĩna godaja bero jeame ũjuroju warā yirāji ĩna. ²² Mua adocāta ñeñarisere cūdirā meje ña mua ĩja. Ñeñarise jidicācōri Diore cūdirā ña mua ĩja. Dios ĩ āmoro bajiro riti ñe cūdirā ñari, buto busa ñe cūdi āmorā yirāji mua. Ito bajiro mani yija, ĩ rāca riti ñatīñarā yirāji mani. ²³ Mani ñeñaro yirise waja, waja yirā bajiro godarā yirāji mani. Ito bajiri seti cutirā ñari Dios tu queno eja masimenaji mani. Jesucristo mani Ūjure mani tuorūñujama, ñe waja manoti catitīñare gaye ĩsigū yiguīji Dios manire.

7

Romio manumu cutigo, iso manumu rāca riti ñaja quena, yire gaye

¹ Yu ñarā, mua ña rotire gaye masirā. Mani catirocō rotire gaye cūdirāona ña mani. Mani godaja berojuma, no yicōri itire cūdi masia manoja manire. ² Rotire gaye ado robojuma gotia manire: Romio manumu cutigo, iso manumu rāca riti ñaja quena, ĩ catirocō. Iso manumu godaja bero, rotire gaye cūdibeco meje yamo iso, gājire

iso manujũ cutija. ³ Iso manujũ ã catibojarocati, gãji rãca iso ñaja, manujũ cutibojagoti ajeri maso ñamo isoõcõ. Ito bajibojarocati iso manujũ godaja bero gãji rãca iso manujũ cutija, Dios rotirise cudibeco meje yamo iso. Ito bajiro yigo manujũ godagoro ñari ajegoõcõ meje ñamo iso.

⁴ Ito bajiroti yũ ñarã Cristo ñarã ña mani ãja. Iti rumũ Cristo ã godaroto riojua mani ujũ robo bajirise ñayijũ rotire gaye maji. Adocãtama Jesucristo manire ã goda ãsirajuna suoriti mani ujũ robo bajirise meje ña ãja. Cristo ãjua ñami mani Ujũ ñasagũ. Ito yicõri ã ñarã ña mani. Cristo ã godaja bero ã tũdi catiroca yĩni Dios. Ito bajiro yĩni Dios ãre mani queno moa ãsi masitoni. ⁵ Jesure mani masiroto riojũajũ, mani ãmoriseti yicũ mani maji. Dios ã rotirise masibojarãti itire cudi ãmobiticũ mani. Ito bajiri mani ya rujũ ñeñaro iti tuoãro bajiroti ñeñaro yicũ mani maji. Dios ã rotirisere cudimena ñari, buto busa ñeñarise yicũ mani. Ito bajiri jeame ãjurojũ warona ñacũ mani maji. ⁶ Adocãtama, “Dios ã rotirisere yũ cudibeja, jeamejũ yure cõagũ yiguĩji ã”, yi tuoã gũirã meje ña mani. Cristore buto tuorũnua mani adocãta. “Cristore yũ tuorũnũja yure masogũ yiguĩji Dios”, yi tuoãrã ña mani ãja. Espiritu Santo mani ya usijũ ñagũ, ñeñarise yire jidicãroca yami. Ito yicõri, quenarisejua wasoaro ca yami ã.

Manireti ña ñeñarise, yire gaye

⁷ Dios ã rotirise, ¿no bajiro yirã yati mani? “ã rotirise ñeñarise ña”, ¿yirujati mani? Meje yibitirũja manire. Dios ã rotirise manire gotia, “Iti ña ñeñaro yire gaye”, mani yi masitoni. Dios rotirise iti manija, “Iti ña ñeñaro yire gaye”, yi masibitiboana mani. Adi gaye tuoãate mua: “Gãji ya gajeonireti uobesa”, yi gotia Dios rotirise. Ito bajiro ã yibeja, “Gãji ya gajeoni ãmotire ñeñarise ñaroja”, yi masibitiborũja yũ. ⁸ Ito bajiri iti rotirise masicõri, ñeñaro yigũ ñari buto busa gãji ya gajeoni ãmoticũ yũ. Iti rotire

masibiticōri buto gāji ya gajeoni āmotibiticu yu maji. ⁹Dios ĩ rotirise yu masiroto riojua maji, “Buto queno yigu ña yu”, yi tuoĩabojacu yu maji. Dios ĩ rotirisere masigũ ñabojaguti, buto busa ñeñarise yi āmocu yu maji. “Ñeñaro yigu ña yu. Ito bajiri jeame ũjuroju wacu yiguja yu”, yi masibojacu yu, yi masirea. Ito bajiri buto bojori buja ñacu yu. ¹⁰Ĭ rotirise cūñi Dios, masa ĩna queno ñatoni. Yuaama Dios ĩ rotirise masicōri, buto bojori buja ñacu. Ñeñarise yicōri, “Jeame ũjuroju wacu yiguja yu”, yi tuoĩacu yu. ¹¹Yu ñeñaro yirise tuoĩacōri, buto ñeñaro yi āmocu yu. Yu ñeñaro tuoĩarise yure ruoyija. Dios ĩ rotirisere cudi āmobiticu yu. Iti rotirise masicōri, “Jeame ũjuroju wacu yiguja yu”, yi masibojacu yu. Ito bajiri buto bojori buja ñacu yu.

¹²Iti rumu maji ito bajiro tuoĩabojacu yu. Adi rumari ado bajiro ya yu ĩja. Jeyaro Dios ĩ gotirise quenarise ña. Ito bajiri Dios ĩ rotirise riojo gotirise ñaroja, ito yicōri quenarise. ¹³Adi rotirise quenarise ñabojaroti, ¿mani jeame ũjuroju waroca yirojada? Meje ito bajiro meje bajia. Mani ñeñaro yire, mani jeame ũjuroju waroca yiroja. Dios ĩ rotirise mani masija bero, ñeñaro mani yirise, “Ñeñaro ya yu”, yi tuoĩa mani. Ñeñaro yire masicōri, “Jeame ũjuroju wacu yiguja yu, ñeñaro yigu ñari”, yi tuoĩa masia mani. Ito yija Dios rotirise masibojarāti, itire mani cudibeja, iti ña buto busa ñeñarise.

¹⁴Mani masia, Espiritu Santona suoriti ĩ rotirise cūñi Dios Moisés ñayorure. Manire Espiritu Santo ĩ ejabuabeja, Dios ĩ rotirisere cudi masimenaji mani. Yu masia, ñeñaro yigu ña yu. Ito bajiri ñeñaro yitĩña yu. ¹⁵¿No yija, ito bajiro yiguja yayua yu? Masibea yu itire. Queno yu yi āmobarise gaye yibea yu. Ñeñaro yu yi āmobitibojarejuare itijuare ya yu. Masibea yu. ¿No yija itire yiguja yayua yu? ¹⁶Ito yija ñeñaro yi āmobitibojaguti,

ñeñaro ya yu. Ito bajiro yu yija, “Dios ï rotirise quenarise ña”, yi tuoïa yu. ¹⁷ Ito bajiri adocãta, ñeñaro yu yirise yumasí meje ya. Ñeñaro tuoïare yure ñacõri, iti ña ñeñaro yiroca yure yirise. ¹⁸ Yu masia, yu tuoïarise quenarise ma yure. Quenarise yu yi âmobojarocati, quenarise yire ma yure. ¹⁹ Quenaro yu yi âmorisere, itire yibea yu. Ito bajibojarocati ñeñarise riti ya yu, yu âmobitire. ²⁰ Ito yija ñeñaro yu yi âmobitire yu yija, yumasí meje ya. Ñeñaro yire gaye yure ñacõri iti ña ñeñaro yiroca yure yirise.

²¹ Ito bajiro riti bajisotia yure. Quenarise yu yi âmobojaja, no masia ma yure, ñeñarise yureju ñacõri. ²² Yu ya usinama rujeguti Diore cudi âmoboja yu. ²³ “Queno yu yi âmoja, ñeñarise yure ñacõri, queno canamuo-bea iti”, yi tuoïa yu. Yu ya usinama Diore cudi âmoboja yu. Ito bajibojarocati yu ya rujuti ñeñaro ya yure. Ito bajiri ñeñarise jidicã masibea yu.

²⁴ Bujatoguti bajicõa yu. Yu ya rujuna ñeñaro yu yirise waja jeame ãjuroju wacu yiguja yu. ¿Ñimujua yure masogũ yiguñida? ²⁵ Ado robojua baja. Mani Ëju Jesucristo yure masocãñi. Yure yiarí Jesucristore cõañi Dios. Ito bajiri, “Queno ya mu”, ya yu ïre. Yu ya usi ñarocõnati ruje Diore cudi âmoa yu. Ito bajibojarocati ñeñaro tuoïare yure ñacõri, iti ña ñeñaro yiroca yure yirise. Queno yíni Dios. Ñeñaro yu yibititoni Jesucristore cõañi ï.

8

Espíritu Santore mani cudija Dios ñarã ñarã yirãji mani, yire gaye

¹ Cristo ñarã mani ñaja, ito yicõri ï rãca sigũre bajiro mani usi cutija, manire waja senibicu yiguñi Dios. Cristo ñarã ñari mani ya ruju ñeñaro iti tuoïaro bajiroti yi âmomenaji. Ito yicõri Espiritu Santo ï rotiro bajirojua yisotirãji mani. ² Mani ñeñaro yirise ñaroja mani godaroca yirise.

Ito bajibojarocati Jesucristore mani tuorñuja, Espíritu Santo mani catitñaroca yigu yiguñji. Cristo yagu yu ñajare, Espíritu Santo yure ejabuagu yiguñji, ñeñaro yu yibititoni. Ito yicōri jeame ñjuroju yu wabore ñaroca yure masocãñi. ³ Dios rotirise ñarocōti cudi jeo masia ma manire. Ito bajiri, “Dios ñ rotirisere yu cūdire waja, yure masogũ yiguñji”, yi masibea mani. Ado bajirojua baja. Dios ñ Macugorore adi macãrucūroju cōañi. Mani ñeñaro yiri rujũ bajiro rujũ cutiñi. Mani robo rujũ cutibojaguti ñeñarise yibisĩ ñ. Ñ ya rujuna ñeñaro yĩabicu ñari, mani ñeñaro yirisere ñarocōti waja yi jeoñi ñ. Ito bajiri, “Ñ ejabuarisena, ñeñaro yibicuja yu”, yi masirãji mani. ⁴ Ito bajiro manire goda ñsiñi ñ, Dios rotirise bajiro quenarise mani yitoni. Adocãta ñeñaro mani tuoñarise rãca ñamenaji mani. Espíritu Santo ñ ãmoro bajiro yirãji mani.

⁵ Ñeñaro tuoñacōri ñna ñeñaro yirotire tuoñasotirã yirãji ñna. Espíritu Santo ñ ãmoro bajiro yirãma, ñ ãmoro bajiro riti yirona tuoñasotirã yirãji ñna. ⁶ Ñna ya rujũ ñeñaro iti tuoñaro bajiroti tuoñasotirã, ñna godaja bero jeame ñjuroju warã yirãji ñnaõna. Ito bajibojarocati, “Espíritu Santo ñ ãmoro bajiro yicuja yu”, yirã, catitñarã yirãji. Ito yicōri ñna ya usijũ queno wanũ quenarise rãca ñnarã yirãji ñna. ⁷ Ñeñaro yire tuoñarã, Diore tuo terãji ñna. Dios rotirise cudi ãmomenaji ñna. Ito yicōri, no masia manoja ñnare. ⁸ Ito bajiri, “Yu ñeñaro yirise riti yi wanũ ñacuja yu”, yirã, Dios ñ ãmoro bajiro yi masimenaji ñnaõna.

⁹ Mani ya usijũ Espíritu Santo ñ ñaja, ñ ãmoro bajiroti yirã yirãji mani. Ito yicōri mani ñeñaro tuoñarise bajiro meje yirãji mani. Espíritu Santo ñ ya usijũ ñabeja Cristo yagu meje ñnami ñocũ. ¹⁰ Riti ñna, mani ñeñaro yiri rujũ godaro yiroja. Ito bajibojarocati Cristo mani ya usijũ ñ ñaja, catitñarã yirãji mani. “Quena ñama ñna. Ñe

seti ma ñnare”, yi boca ãmigũ yiguĩji Dios manire. Ito bajiri catitĩñarã yirãji mani. ¹¹ Espíritu Santona suoriti Cristo godarure mucana tãdi ñ catiroca yĩni Dios. Mucana ñti ñami mani ya ruju godarotire mucana tãdi catiroca yirocu. Ito bajiro yigu yiguĩji ñ manire. Espíritu Santo mani ya usiju ñ ñaja, catitĩñare gaye ñsigũ yiguĩji ñ manire.

¹² Ito bajiri yu ñarã, juaji ñeñaro yi uyabituraja manire, iti rumu mani yicato bajiro. Espíritu Santo ñ ãmoro bajirojuã yirãji mani. ¹³ Ñeñaro mani tuoïarise mani yija, godarã jeame ñjuroju warã yirãji mani. Ito bajibojarocati Espíritu Santona suoriti mani ñeñaro yirise mani jidicãja, catitĩñarã yirãji mani.

¹⁴ No Espíritu Santo ñ rotiro bajiro yirã, Dios rĩa ñama ñna. ¹⁵ Ado robojuã bajaia. Espíritu Santo manire queo sãñi Dios. Ito bajiri moari masa ñna ñjure güirã bajiro meje ñna mani. Adocãta Dios rĩa ñre queno cudirã ñna mani. Ito bajiri, “Yu Jacu, Cuna”, ya mani Diore. ¹⁶ Espíritu Santo mani masiroca yami, “Dios rĩa ñna mani”, mani yitoni. ¹⁷ Ñ rĩati ñacõri, quenarise ñ goticãre boca ñmirã yirãji mani. Cristo rãca boca ñmirã yirãji mani, Dios ñ goticãre gaye. Cristo robo mani tõbujaja, ñ rãcati mani wanu quenaroca yigu yiguĩji Dios manire.

Ija mani boca ãmiroti wanu quenare ñaro yiroja, yire gaye

¹⁸ Adi rumuri ñeñaro mani tõbujaja, “¿No yicõri bujato tõbujati yu?” yi tuoïare ma. “Ñeñaro mani tõbujagore rëtoro ñnarisise ñna ñja ñmacũju mani wanu quenaroti gaye”, yi tuoïa yu. ¹⁹ Co rumu Dios ado bajiro yigu yiguĩji: “Ñna ñama yu rĩa yure queno cudirã”, yigu yiguĩji Dios. Ñ rujeore ñnarocõti buto bocatia, ñ ito bajiro yirotire. ²⁰ Dios cajero gaye, ñ rujeore gaye bajiro meje bajaia adi rumuri. Adi rumuri jeyaro jogarise riti ñna. Ito bajiro rëtarotire cõsuoyiju Dios, Adán ñ ñeñaro yirajuna suori. Ito bajiro

riti bajitĩña yibetoja. ²¹ Co r̄m̄m̄ Dios ĩ rujeore ñarocõti quenogũ yiguĩji ĩ m̄c̄cana. Ito bajiri ĩ r̄ĩa ñari m̄c̄cana t̄uđi juaji ñeñaro yimenaji mani. Adi r̄m̄m̄ri jeyaro jogarise riti ña. Ija ĩ wasoari r̄m̄m̄ m̄c̄cana t̄uđi juaji jogabetoja iti. ²² Mani masia, adocãta Dios ĩ rujeore ñarocõti ñeñaro t̄õb̄uja iti. Romio iso mac̄u c̄utiro robo bajiro ñeñaro t̄õb̄uja iti jeyaro. ²³ Mani c̄uni Jesure masirã, ñeñarise t̄õb̄uja. Ito bajiri Esp̄iritu Santo Dios manire queo sãre ñajare, “Ito bero juaji ñeñarise t̄õb̄uja yibic̄uja ĩja ȳu”, yi t̄uoĩa mani. Ito bajiri Dios mama ruj̄u manire ĩ ĩsiroti ruj̄ure, yurã yirãji mani. Iti ruj̄u jogabeto yiroja, ito yicõri ñeñarise t̄õb̄ujabeto yiroja. Ito bajiro ĩ yiri r̄m̄m̄, “Ãna ñama ȳu r̄ĩa”, yiḡu yiguĩji. ²⁴ Cristore mani t̄uor̄ũn̄urajuna s̄uoriti, manire masoñi Dios. Mani t̄uoĩa yurise r̄etagore meje ña. R̄etare gaye t̄uoĩa yu masimenaji mani. R̄etabiti gayereama t̄uoĩa yurã yirãji mani. ²⁵ R̄etabiti gayere t̄uoĩa yurã, “Ito bajiro r̄etaro yiroja”, yi t̄uoĩa yucõri, ñe usirioari meje, bocatirãji mani. Ito yicõri, ñe usirioro meje mani bocatiroca ya iti.

²⁶ Ito bajiroti Esp̄iritu Santo manire ejabuami, mani queno masimena ñajare. Diore queno seni r̄ũc̄ub̄uo masibebea mani. Ito bajiri Esp̄iritu Santo manire yiari josa ĩsiguĩji Diore. “Diore ȳu seni ãmobarise queno goti masibebea ȳu”, yi mani t̄uoĩarise masicõri, manire yiari busi ĩsigũ yiguĩji ĩ Diore. ²⁷ Mani t̄uoĩarise t̄uo masi jeogu ñari, Esp̄iritu Santo gotirisere t̄uo masi jeogu yiguĩji Dios. Dios ãmoro bajiroti seni masicõri manire yiari Diore senigũ yiguĩji Esp̄iritu Santo. Ito bajiri Dios sigũ t̄uo masire gaye busi masigũ ñari manire yiari queno Diore busigu yiguĩji Esp̄iritu Santo.

Cristore t̄uor̄ũn̄urã ñari ñeñariserẽ r̄etocũrãji mani, yire gaye

²⁸ Riti Diore mani maija, “Ī ãmoro bajiro yu yisotitoni yure beseñi Dios”, yi tuoña masia mani. “Jeyaro yure rētarise quenarise ña. Quenarise riti yure rētaroca yigu ñami Dios”, yi tuoña masia mani. ²⁹ Cajerojuti mani ĩre tuorũnũronare masiñi Dios. Manire beseñi ĩ, ĩ Macu Jesucristo robo mani bajitoni. Ito bajiroti Dios rĩa ñarã, mani rĩjorũ ñami Jesús. ³⁰ Cajerojuti ĩ rĩa ñaronare manire beseñi Dios. Manire besecõri, “Queno yirã ñama ĩna. Ñe seti ma ĩnare”, yi boca ãmiñi Dios. Manire boca ãmicõri, ĩ Macure ĩ yiado bajiro ñasarã mani ñaroca yigu yiguĩji Dios manire.

³¹ Iti oca quenarisere tuocõri, ¿no bajiro yirãti mani? Ado bajiro yirũja manire: “Dios manire ejabuagu yiguĩji, ito yicõri manire jidicãbicu yiguĩji. Ito bajiri no yibea gãjerã manire ĩna ti teja”, yirũja manire. ³² ĩ Macure maibojaguti, manire yiari goda ĩsi rotĩni Dios. Ito bajiri, “Riti ña. Ñe ruyabeto, jeyaro quenarise manire yi ĩsigũ yiguĩji Dios”, yi tuoña masia mani. ³³ Dios manire boca ãmi wacu, “Quenarã ñama ĩna. Ñe seti ma ĩnare”, yiñi Dios. Ito bajiro ĩ yija, noajua gãjerã, “Seti ña ĩnare”, yi masimenaji. ³⁴ Nijua mami, “Īna ñeñaro yirise waja, waja ruyurioama ĩna”, yigu. Mani ñeñaro yirise waja, waja yi jeoñi Jesús. Ito bajiri, “Īnare seti ña”, yibiquĩji Jesús. Macana caticõri, Dios ya riojocaduja rucuboraju ñaguĩji ĩ. Ito yicõri manire yiari Diore busi ĩsigũji ĩ. ³⁵ Manire buto maiguĩji Cristo. Ito bajiri ñimũjua manire ĩ mairise jidicãroca yi masibiquĩji. Mani yija, ñeñaro tõbujarã yirãji gajea. Mani yija, güirã yirãji gajea. ĩna yija, gãjerã manire usirioro yi coderã yirãji gajea. Mani yija, ñiojogarã yirãji gajea. Iti yija, sãñare ruyaro yiroja gajea, manire. Mani yija, guijoroju warã yirãji gajea. ĩna yija, gãjerã manire sãrã yirãji gajea. Iti jeyaro manire rētabojarocati manire jidicãbicu yiguĩji Jesús. Manire mai jidicãbicu yiguĩji.

³⁶ Ado bajiro gotiyjũ Dios oca goti ĩsiri masũ, ĩ oca tuti uca wacũ:

Mũ ñarã gua ñajare, co rumũ ruyabeto guare gãjerã sĩa ãmoama. Ovejare ĩna sĩarocũ bajiro guare yama, yiyijũ Dios oca goti ĩsiri masũ.

³⁷ Ñeñaro gua tũbujabojarocati, guare rētocũmena yirãji gãjerã. Cristo manire maigũ ĩ ejabuaja, jeyaro manire rētarise ñemecuti sēorã yirãji mani. Cristore tuorũnũcõri buto busa tuoĩa oca sēorã yirãji mani.

³⁸ Disejua Dios manire ĩ mairise jidicãroca yibetoja. “Riti ñaroja iti”, yi tuoĩa yũ itire. Disejua mani catibojaja, mani godabojaja cuni, Dios ĩ mairise manire camotabetoja. Dios ñaro gãna cuni, rũmũa cuni, ãmũa ñasari masa cuni, Dios manire ĩ mairise jidicãroca yi masimenaji. Adocãta rētarise, ĩja rētaroti cuni, Dios ĩ mairise camotaroca yibetoja manire. ³⁹ Mani jubejũ ñabojaja cuni, ãmacũjũ mani ñabojaja cuni, no mani ñaroti Dios ĩ manire mairise jidicãroca yibetoja. Disejua Dios ĩ rujeore manire ĩ mairise camota masibetoja. “Cristo mani Ŝjũ manire ĩ yi ĩsirajũna suoriti buto maiami Dios manire”, yi tuoĩa mani.

9

Israel sita gãnare Dios ĩ besere gaye

¹ Yũ gotirise riti ña. Cristore tuorũnũgũ ñari ĩ yagũ ña yũ. Ito bajiri socabea yũ. “Espĩritu Santo ĩ ejabuarisena riojo oca gotia yũ”, yi tuoĩa yũ. ² “Jesucristore tuorũnũ ãmobeama yũ ñarã”, yi tuoĩacõri buto bojori buja yũ. ³ ĩnare maigũ, jeame ãjũroju ĩna ware ãmobeama yũ. ĩnare jeame ãjũroju Dios ĩ cõame yirocũ, yũjũare ĩ cõa ãmojama camotabitibogũja yũ. ⁴ ĩna ñama yũ ñarã, Israel ñayoru janerãbatia. Jane mejeju ĩnare besebojayijũ Dios ñarã ĩna ñatoni. ĩ masirise, ĩoyijũ Dios ĩnare. Ito yicõri ĩ rotirise cuni ĩnare gotibojayijũ ĩ. “Ado bajiro yicõri yũre mũa

rũcũbuore ãmoa yũ”, yiyijũ Dios yũ ñarã ñasũoanare. “Queno mũare yigũ yigũja yũ”, yiari goti yucãyijũ Dios yũ ñarãre. ⁵ Yũ ñarã bucurã ñasũoana janerãbatia ñama ñna. Cristo cuni yũ ya butu gaguti rujeañi. Cristoti ñami Dios, masa ñarocõreti rotigũ. Coji ruyabeto ñre rũcũbuotĩñarũja manire. Ito bajiro riti bajitĩñajaro.

⁶ Yũ ñarã, judio masare, Dios oca quenarise ñ gotibojarocati coriarãti ñama ñre bajiro tuoĩarã. “Judio masare Dios ñ goticãdo bajiroti yibeami”, yi tuoĩabitirũja manire. Judio masa rujeabojarãti jeyaro Dios ñarã meje ñarãji ñna. ⁷ Abraham janerãbatia, ñna ñarocõti, ñ janerãbatia goro meje ñama, Dios ñ tija. Ado bajiro Abrahamre gotiñi Dios: “Mũ macũ Isaac ñ rĩa ñna ñarã yirãji mũ janerãbatia goro”, yiyijũ Dios Abraham ñayorũre. ⁸ Iti oca tuoõõri, “Abraham janerãbatia riti rujearã, Dios rĩa ñama ñna, yireoni meje ña iti”, yi tuoĩa mani. Ado bajirojũa bajaia: Dios ñ goti cũrise tuoõũnrã, ñna ñama mũcana tũdi rujeana, ito yicõri Dios rĩa. Ito bajicõri Abraham janerãbatia goro bajiro bajiamã ñna ñja. ⁹ Ado bajiro goti yucãyijũ Dios Abrahamre: “Ñjaca rodo adocõ tũjarocati wadigũ yigũja yũ. Ito yicõri mũ manojo Sara wame cutigo macũ rucogo yigõji iso”, yiyijũ Dios Abrahamre.

¹⁰ Adiacã riti meje ña. Ado bajiro bajaia gaje. Ñna macũ Isaac jai tujacõri, Rebeca rãca manojo cutiyijũ ñ. Rĩa sũrũayijõ iso. Ito bajibojarocati jacũama sũgũti ñayijũ. ¹¹⁻¹³ Iso rucoroto riojũa, ado bajiro gotiyijũ Dios isore: “Mũ macũ ñasũogũ ñ ocabajire moa ñsiri masũ ñagũ yigũji ñ”, yiyijũ Dios, Rebecare gotigũ. Jane mejejũ ito bajiroti gotiyijũ Dios ñ oca tutina. Ado bajiro bajiyijũ: “Esaũ rẽto busaro maia yũ Jacobre”, yiyijũ Dios ñ ocana ñna jũarã rujearoto riojũa. Quenarise, ñeñarise cuni ñna yibetojũ, gotiyijũ Dios itire maji. Ito bajiri, “Dios ñ tuoĩaro bajiro beseami masare. Ñna yigorena sũori meje beseguĩji Dios. Ñ

ãmoro bajiroti beseguĩji”, yi tuoĩa mani.

¹⁴ “Gãjerãre bese, gãjerãre besebiti ĩ yija, ñeñaro yami Dios”, yi tuoĩabojama coriarã. Ito bajirojua meje bajaia.

¹⁵ Dios sġgũti bese masiguĩji ĩ. Ito bajiri ado bajiro yiyijũ Dios, Moissés ñayorure: “Yũ ãmorãrecõti ĩnare ti maigũ yigũja yũ”, yiyijũ Dios Moissés ñayorure. ¹⁶ Dios queno yami masare. ĩ ti mairo roboti yami. Masa ĩna queno yire ãmoja meje, ito yicõri buto ĩna moaja meje, ĩ ti mairo bajiro queno yami Dios masare. ¹⁷ Ucara tutina ado bajiro yiyijũ Dios Egipto gagũ ujure: “Ujũ mare cũcũ yũ, mũna suoriti yũ masirise masare ĩorocũ. Ito bajiro yicũ yũ masa jeyaro yũ gayere ĩna tuo jeditoni”, yiyijũ Dios, Egipto gagũ ujure. ¹⁸ Iti tũocõri, “ĩ ti mairãre riti ti maiguĩji Dios. Ito yicõri, ‘Yũre cãdibicũre ĩre cãdibitiroca yigũ yigũja yũ’, yicõri, ĩ ãmoro bajiro yigũ yiguĩji Dios”, yi tuoĩa mani.

¹⁹ Ito bajiro bajija tũocõri, “¿No yija, ‘Mũare seti ñã’, yigũ yiguĩjida Dios manire?” yirãji mũa coriarã. “ ‘Dios ĩ ãmoro bajiro yibicũja yũ’, yi masigũ mami”, yirãji mũa. Ito bajiro yũre mũa busija, ado bajiro mũare cãdicũja yũ: ²⁰ Ito bajiro busibitirũja mũare. “Dios ĩ yire quenabea”, yiado ma mũare. Riri sotũ, “¿No yija yũre ito bajiro yũre meniri mũ?” yibetoja iti sotũ menirore. ²¹ Riri sotũ meniri maso iso ãmoro bajiroti menigõji. Iti ririnati quenari sotũ iso meni ãmoja, menigõji. Itinati ejori iso meni ãmoja rocati busa bajiro menigõji iso ãmoro bajiroti.

²² Iso yiado bajiroti ĩ ãmoro bajiro yigũ yiguĩji Dios cuni. ĩ masirise ĩo ãmobjaguti ito yicõri masa ĩna tũbũjaroca yi ãmobjaguti, itire yibisijũ Dios. Ado robojua bajaia. “ĩnare ruyuriorũja yũre”, yibojaguti, ñeñaro ĩna tũbũjaroca yi usiriobisijũ Dios. ²³ Ito bajiro yiĩni Dios, mani ĩ ti mairãre, “ĩti ñami rẽtoro masigũ”, mani yi tuoĩatoni. Cajerojuti manire ti maicõri beseñi Dios, ĩ masirise manire ĩsirocũ. ²⁴ Mani ĩre tũorũnutoni, manire beseñi Dios. Mani coriarã

judio masa ña. Gãjerã judio masa meje ñama. Ito bajibojarocati mani ñarocõreti beseñi Dios. ²⁵ Ado bajiro bajia Dios ï yire, Oseas ñayoru ï ucare jane mejeju gaye:

Yũ ñarã mejere cuni, “Yũ ñarã ña mua”, yigu yiguja yũ.
 “Cajero muare ti maibiticu yũ. Adocãta muare ti maia yũ”, yigu yiguja yũ.

²⁶ “Yũ rĩa meje ñama”, Dios ï yiadoju, ñnati Dios rĩa ñarã yirãji. Dios catitĩñagũ rĩa ñarã yirãji. Ito bajiro ucayoñi Oseas jane mejeju.

²⁷ Isaíasjua, ado bajiro busiyoyiju, Israel sita gãnare tuoĩa yugu: “Israel gãna jãjarã busa bujuama. Jai rëtocücõri, ja sitacõ jãjarã ñama ñna. Jãjarã ñna ñabojarocati coriarãreti masogũ yiguñi Dios. ²⁸ Dios ï goticãdo bajiroti yigu yiguñi. Jãjarã adi macãrucũro gãna masa, ñna ñeñaro yirise waja, ñnare waja senigũ yiguñi Dios. Ito yicõri cojisiti ñnare ruyuriogu yiguñi”, yĩ ucañi Isaías. ²⁹ Ito yicõri, ucaguti ado bajiro yiyiju Isaías:

Dios masa jeyaro ujũ ñagũ, mani rĩa sīgũre ï masobeto bajija, mani judio masa jeyaro maniboana mani. Dios Sodoma, Gomorra gãnare ï ruyurioado bajiro, manire yiboru, manire sīgũ ï masobeto bajija. Ito bajiro yiari ucañi Isaías.

Cristo ocare judio masa ñna tuo ãmobitire gaye

³⁰ Riti ña. Itire tuocõri ado bajiro yi tuoĩa masia mani: “¿No bajiro yirujati guare, Dios riojo, ‘Quena ña mua’, ï yitoni?” yĩ tuoĩabisjarã judio masa meje ñarã. Ito bajibojarocati, “Queno yirã ñama. Ñe seti ma ñnare”, yigu yiguñi Dios, Cristore ñna tuorũnuja, yĩ tuoĩa masia mani.

³¹ Yũ ñarã, judio masama ado bajiro yi tuoĩabojayijarã: “Queno gũa yija, ‘Queno yirã ñama’, yigu yiguñi Dios guare”, yĩ tuoĩabojayijarã ñna. Dios ï rotirise ñarocõti, ñna cudibejare, “Queno yirã ñama ñna”, yĩ masibisiju Dios.

³² Ado bajiro bajia. Judio masa Diore tuorũnũrã meje

ñayijarã. “Quenaro gua yirise ticõri, ‘Queno yirã ñama ñna’, yigũ yiguĩji Dios”, yi tuoĩabojayijarã ñna. Cristore boca ãmimena ñari, masa ñna camota cũado bajiro Dios tu eja masibisijarã ñna. Cristore ñna boca ãmi ãmobeja, gũtagã camotado bajiro bajiami ñ. ³³ Itire ñ oca tutina ado bajiro busiami Dios:

Siõn wame cutiri cutojũ Cristore cũa yũ. Gũtagã camotado bajiro bajigũ Cristore cũa yũ. Ñre ñna tuorũnubeja camotagu yiguĩji ñ. Ito bajiri yũ tu eja masimena yirãji ñna. No Cristore tuorũnugũti bojori bujabicu yiguĩji. Wanũ quenagũ yiguĩji ñ. Ito bajiroti gotiyijũ ñ oca tutina, jane mejejuti.

10

¹ Tuoya, Jesure tuorũnrã mũa. Gãjerã yũ ñarã, Dios jeame ãjurojũ ñ cõabore, ñ masoja, buto itire wanũ quenagũja yũ. Iti ñna Diore yũ seni tuoĩarise. ² Yũ ñarã, Israel gãna, Dios ñ ãmorise ñna tuoĩarisenã buto yi ãmbojojama ñna. Ito bajibojarocati, “Iti ñna ñ ãmorise”, yi tuoĩa masibeama ñna. ³ “Cristo mani ñeñaro yirise waja yicãñi. Ito bajiri Dios ñ tija, seti ma manire”, yi tuoĩabeama ñna. “Ñ rotirise gua cudija, ‘Queno yirã ñama ñna’, yigũ yiguĩji Dios”, yi tuoĩabojama ñna. Ito bajibojarocati Dios ñ ãmoro bajiro yibeama ñna. Ito yicõri Diore queno tuorũnubeama ñna. Ito bajiri, “Queno yirã ñama ñna”, yibiquĩji Dios. ⁴ Cristo ñ ejaja bero, ñna suoriti manire masogũ yiguĩji Dios. Adi rumuri, no Cristore tuorũnugũti, “Ñ ñami queno yigũ. Seti macũ ñami”, yiguĩji Dios. Cristo ñ goda ñsirajuna suoriti manire masoguĩji Dios. Ito bajiri, “Dios rotirise mani cudirajuna suoriti manire masogũ yiguĩji”, yire ma ñja.

⁵ Moisés ñayorũ jane mejejũ ado bajiro busiyijũ: “No Dios rotirise ñarocõti cudigũ catitĩñare bujagũ yiguĩji”,

yi ucayijũ Moisés ñayorũ. ⁶ Ito bajibojarocati, sġgũja mami Dios rotirisere ñarocōti cūdigũ. Cristore masa ña tuorũnja ticōri, “Queno yirã ñama ña. Seti ma ñare”, yigũ yiguĩji Dios. Iti ocare ado bajiro gotia manire, Dios oca: “¿Ñimũ ũmacũju tigũ ejayijari? ‘Itoju gagũ wadirũ ñami Cristo’, yi masiana”, yirona. Ito bajiro tuoĩabitirũja mũare. ⁷ “¿Ñimũ godana tũju ejarũda Cristo ĩ tujaja tirocũ?” yi tuoĩabiticōrũja mũare. ⁸ Dios oca ado bajiro gotia: “Dios riasore gaye ñacã mũare. Ito bajiri iti riasore gaye masicã mua. ĩ riasore gayere busiyija mua”, yi gotia Dios oca. “Cristore masa tuorũnũre ãmoguĩji Dios”, yire gaye ña iti oca. Ito bajiro masare riasoa gũa iti oca. ⁹ “Jesús ĩ godaja bero mũcana tũdi ĩ catiroca yĩni Dios”, mani yi tuoĩaja, ito yicōri “Jesús ñami yũ Ʋju”, mani yija, jeame ũjuroju mani wabore ñaroca manire masoguĩji Dios. ¹⁰ Cristore mani tuorũnja ticōri, “Queno yirã ñama ña. Ñare seti ma”, yigũ yiguĩji Dios. Ito yicōri, “Jesure tuorũnũgũ ña yũ”, yi gãjerãre mani goti rětobuja, riti Dios ĩ masoana ñarã yirãji mani ĩja.

¹¹ Ado bajiro gotia Dios oca tuti: “No ĩre tuorũnurã, ‘Bũjato baja yũre’, yirã mama”, yi gotia Dios oca. ¹² Dios ĩ tija judio masa, judio masa mejere cuni, coro bajiroti tiguĩji ĩ. Mani Ʋju ñami ĩ, ito yicōri jeyaro Ʋju. No ĩre senigũre queno yigũ yiguĩji Dios. ¹³ Dios oca tuti ado bajiro gotia: “No Jesure, ‘Yũ Ʋju ña mũ. Yũ ñeñaro yirisere ãcabojoya. Jeame ũjuroju yũ wabore ñaroca yũre masoña’, yirã masoana ñarã yirãji”, yi gotia Dios oca. ¹⁴ Cristore ña tuorũnũbeja, ĩre seni masimenaji ña. Ito yicōri Cristo gayere ña tuobeja, ĩre tuorũnũ masimenaji ña. Sġgũ ñare Cristo oca riasobeja, masimena yirãji ña. ¹⁵ ĩ oca gotirona mani cõabeja, ĩ oca riasorã manaji. Ado bajiro gotia Dios oca: “Dios oca quenarise riasorã, no ña gotiroju masa ña tuoja, wanũ quenarã yirãji ña”. Ito bajiro ucare ñayija

jane mejejutì.

¹⁶ Masa jãjarã oca quenarise tuobojarãti itire tuorũnũbeama ãna. Jane mejeju Isaías ã ucado bajiroti baja: “Yũ Hju, coriarãti ñama mu ocare tuorũnurã”, yiyiju Isaías Diore gotigu. ¹⁷ Cristo oca quenarise ãna tuobeja, itire tuorũnũmenaji ãna. Cristo ocajuare tuosũorũja, ãna tuorũnũroto riojua.

¹⁸ Adire mũare seniãgũ ya yũ: ¿Israel sita gãna Dios oca tuobitianada? Tuobojana tuorea. Dios oca tuti ado bajiro gotia:

Dios oca gotiri masa, masa jeyarore goti jeoñi. Ito yicõri ãna oca coju ruyabeto, tuore ña.

¹⁹ Mũcana mũare jabeto seniã tuogu ya yũ. ¿Dios oca tuobojarãti, queno tuo masibisijari Israel sita gãna? Tuo masibisijarã ãna. Moisés ñayoru ãti ñami cajero iti oca gayere ucasũoru. Dios ã gotiro bajiroti ucayiju ã. Israel sita gãnare Dios ã tuoãare gaye gotigu ado bajiro ucayiju Moisés ñayoru:

“ ‘Tuo rõtobubeama ãna’, mũa yirãre, ‘Yũ ñarã ña mũa’, yigu yigũja yũ ñnare. Ito bajiro yũ yija, buto rorã yirãji mũa. Ito yicõri buto junisinirã yirãji mũa”, yiyiju Dios, yi ucayiju Moisés ñayoru.

²⁰ Moisés ã ucaja bero buto oca sãocõri, ucayiju Isaías. Dios ã yiro bajiroti ucayiju ã cuni:

“Yũre ãmabitibojanajua yũre bũjama. Ito yicõri yũre masi ãmomenajuare, yũre ãna masiroca yicu yũ”, yiyiju Dios judio masa meje ñarãre cuni tuoãgũ, yi ucayiju Isaías ñayoru.

²¹ Israel sita gãna ãna bajirisejua, Dios ã gotirisere ucayiju Isaías: “Co rũmu ruyabeto ñnare jisotiboja yũ, ãna ñeñaro yirisere ãna jidicãtoni. Ito bajibojarocati yiro robo cũdirã meje ñama ãna. Ito yicõri yũre ti terã, tudiana ãna”, yiyiju Dios, yi ucayiju Isaías ñayoru.

11

Coriarã Israel sita gãnare Dios ã masore gaye

¹ “Dios ñarã Israel sita gãna ñnare jidicãcõru”, yire ʒtuoĩati mua? Meje ñnare jidicãbeami. Israel sita gaguti ña yu cuni. Ito bajiri yu ñicu ñasuoruti ñami Abraham ñayoru. Ito yicõri Benjamín ya butu gaguti ña yu. Ito yicõri Benjamín janerãbatia janamiti ña yu. ² Jane mejeju gua Israel gãnare beseñi Dios, ã ñarã ñna ñnaton. Ito yicõri guare jidicãbeami ã. Dios oca tutijũ Elías ñayoru ã oca gayere tiyija mua. Dios rãca busigu, “Israel gãnare seti ña”, yire gaye yiyijũ Elías ñayoru. Tite. Ado bajiro yiyijũ ã, Diore busigu: ³ “Yu Uju, mure goti ãsiri masare sãayjarã Israel sita gãna. Mure rucubũorã ñna soe ãsisotira casabo cuni ruyurioñi ñna. Ito yirã ñari, yure cuni sãa ãmocã ñna. Yu sigũti mu oca gotiri masu catia maji”, yiyijũ Elías Diore. ⁴ Ito bajiro ã yija tuocõri, ado bajiro cudiyijũ Dios: “Mu sigũ meje ña. Siete mil ñarã masa ñnama maji yure rucubũorã. Gãjerã ñna meni rujeoru Baal wame cutigure ñini rjũ rucubũo yibiticã ñna”, yiyijũ Dios Elías ñayoru. ⁵ Elías ã ñaratũa, Dios ã beseado bajiroti adocãta cuni Israel gãna coriarãre beseguĩji Dios, ã ñarã ñna ñnaton. Ñnare ti maicõri ñnare beseñi Dios. ⁶ Ñna queno yirena suori meje beseñi Dios. Ñnare ti maicõri beseñi ã. Ñna queno yirena suori ã besero bajija, ñnare waja yirocu robo beseborũ ã. Quenarise ñna yibitibojarocati, ñnare ti maicõri beseñi Dios.

⁷ Ado robojua bajia. Israel sita gãna, “Queno yirã ñnama ñna”, ã yire ñna ãmobjarocati, “Queno yirã ñnama ñna”, yibisijũ Dios. Coriarãti Dios ã beseana, “Ñna ñnama queno yirã”, yiyijũ Dios. Gãjerãma Dios oca tuo ãmomena ñayjarã ñna. ⁸ Ñna gayere busia Dios oca tuti. Ado bajiro gotia: “Ñre ãmomenare ã oca ñna tuo masibitiroca yiyijũ Dios ñnare. Ito bajiri gãjerã ã ocare ñna gotibojarocati tuo

masibisijarã ãna. Ito bajiroti bajia adi rumuri cuni”, yi gotia Dios oca tuti. ⁹ Ado bajiro yiñi David ñayoru Diore: Israel gãna wanu quenarã, basa ãna menirise bojori bũjaroca yiya. ãna tuoĩa bujatobitiroca yiya. Ito yicõri ãna ñeñaro yirise waja, ãnare waja seniña.

¹⁰ ãna tuo masibitiroca yiya. Sīgũ rũcurise ãmi wacu robo bajiro, ãna ñeñaro yirise tãniroca yiya mu, yiyijũ David ñayoru Diore.

Judio masa mejere cuni Dios ĩ masore gaye

¹¹ ¿No bajiro tuoĩati mua? Dios judio masare, ĩre ãna ãmobejare, ¿ĩnare jidicã ruyuriogu yiguĩjida? Meje ĩnare jidicã ruyuriobiquiji Dios. Judio masa Diore ãna ãmobeja, judio masa mejereama masogu yiguĩji Dios. Ito bajiro gãjerãre ĩ masoja ti masicõri, ãmotirã yirãji judio masa cuni. ¹² Judio masa Diore ãna cudibejare, jaje quenarise gaye masa jãjarãre ejayijũ. Judio masa Cristore ãna tuorũnũbejare judio masa mejere cuni jaje quenarise gaye ejayijũ. Ito bajiri Cristore tuorũnũsooyijarã ãna cuni ĩja. Judio masa cuni Cristore ãna tuorũnũja, buto busa masa jeyarore quenarise ejaro yiroja.

¹³ Mua judio masa mejere cuni busigu ya yũ. Mũare Dios oca gotire ña yũre. Mũare yũ riasotoni yũre cũñi Dios. “Iti ña moare ñasarise”, yi tuoĩa yũ. ¹⁴ Yũ ñarã judio masa, mũare bajiro ãna bajire ãmogũ, itire gotia yũ. Dios mũare masoja masicõri, ãmotirã yirãji ãna cuni. Ito yija Cristore tuorũnurã yirãji gajea. Ito bajiro ãna yija ticõri, ãnare masogu yiguĩji Dios. ¹⁵ Judio masare Dios ĩ jabeto jidicãrajũ, masa jeyarore oca quenarise cũyijũ Dios, ĩ rãca ãna queno ñatoni. Ito bajiro ĩ oca cũyijũ Dios judio masa mejere cuni. Ito bajiri Cristore ãna tuorũnũja Dios ñarã ñarãji ãna cuni. Buto busa quenaroja, judio masa cuni Cristore ãna tuorũnũja. Jeame ãjuroju ãna wabore ñaroca ãnare masogu yiguĩji Dios. Ito bajiri godabojarãti

mucana tũdi catirã robo bajirã yirãji ãna. ¹⁶ Ado bajiro bajia. Jabeto cõjabura gaye, boca ãmicõri, Dios ã quenoja, ñarocõti cõjabura quena jedicoaro yiroja. Yucugũ ñe, jeyaro iti quenaja, jeyaro rãjuri cõni quena jediroja. Ito bajiro bajiyijũ Abraham ñayorũ. Queno yigũ ñari, Diore tuorũnyijũ ã. Ito bajiri ã janerãbatia Diore ãna tuorũnũja, queno yirã ñarã yirãji ãna cõni.

¹⁷ Cogũ yucugũ, olivo wame cutiricũ, rãjũ jatacõacõri, rocati judiragũ rãjũ ãmicõri wõja, cogũ gaye bajiroti bajiroja. Ito bajiroti Dios cõni judio masare cõacõri, judio masa mejere cõni, muare ã ñarã ñatoni cõni ã. Ito bajiri Dios ye quenarise bujacõri gũa judio masa rãca sigũre bajiro bajirã ña mua. ¹⁸ Ito bajiro Dios ã yija, “Judio masa rãto busaro queno yirã ña gũa”, yi tuoãbitirũja muare. “Judio masare mani riojũajũ beseñi Dios”, yire gayere tuoãña mua. Cristo judio masũ ã rujearena suoriti muare masoñi Dios. Ito bajiri, “Judio masa rãto busaro queno yirã ña mani”, yiado ma muare.

¹⁹ Mua judio masa meje ñarã, ado bajiro yiborãji gajea: “Judio masare jidicãyijũ Dios, ã ñarã mani ñatoni. Ito bajiri ñasari masa ña mani”, yi tuoãbojarãji gajea mua.

²⁰ Riti ña, judio masare Dios ã jidicãre. Cristore ãna tuorũnũbejare, ito bajiro yiñi ã, ãnare. Cristore mua tuorũnũbeja, muare cõni cõacõborũ ã. Ito bajiri, “Judio masa rãto busaro ñari masa ña mani”, yi tuoãbesa mua. “Ñasarã meje ña mani”, yi tuoãña mua. Ito bajiro tuoãcõri, “Queno ya Dios mu”, yiya, ãre rãcũbuorã. ²¹ Dios judio masare, cajero ã beseanare ã cõaja, muare cõni cõa masiguĩji ã. ²² “Jaje quenarise gaye yami Dios masare. Ito yicõri masare buto ãna tõbũjaroca cõni yami Dios”, yi tuoãña mua. Ado bajiro bajia. ãre rãcũbuomenare buto ãna tõbũjaroca yibojaguti muare queno yami. Ito bajibojarocati mua ãre rãcũbuotĩñabeja, muare cõni cõacõborũ

ĩ. ²³ Judio masa ĩ cõana, Cristore ĩna tũorũnũja ĩ ñarã ñaroca yigũ yiguĩji ĩ mũcana. ĩ masirisena, ĩ ñarã ñaroca yi masiguĩji mũcana. ²⁴ Judio masa meje mũa ñabojarocati ĩ ñarã bajiro mũare cũñi Dios. Judio masa ñama cajero Dios ĩ beseana. Cajero ĩ beseana meje mũa ñabojarocati josari ĩ ñarã mũa ñaroca yiñi Dios. Judio masa cajero ĩ beseana mũcana ĩ ñarã ñaroca ĩ yija, josari mejeti ñarója.

Israel sita gãnare Dios ĩ masosũsare gaye

²⁵ Yũ ñarã, masa ĩna masibiticati gayere, mũare gotigũ ya yũ. Dios ĩ beseana ña mani. “Jeyaro masirã ña mani”, mũa yi tuoĩabititoni, iti gaye ocare mũare gotia yũ. Adocãta judio masa jãjarã ñama Diore tuo ãmomena. Ito bajiro bajitiñamenaji ĩna. Judio masa meje ñarã, Dios ĩ besecãna, Jesure ĩna tũorũnũja ticõri, judio masa cũni Diore ãmorã yirãji ĩna. ²⁶ Ito bajiro judio masa Diore ĩna ãmoja, jeame mũjuroju ĩna wabore ñaroca ĩnare masogũ yiguĩji ĩ. Ito bajiro ucare ña Dios oca tutijũ:

Sión wame cõtiri cõtõju ejagũ yiguĩji masare masori masũ. Jacob janerãbatiare ĩna ñeñaro yirisere coegũ yiguĩji ĩ.

²⁷ Ito bajicõri, ñeñaro ĩna yirise yũ ãcabojoja, jane mejeju yũ goticãdo bajiroti yigũ yigũja yũ, yi gotia Dios oca tuti.

²⁸ Adocãta judio masa jãjarã Cristo oca quenarise rũcũbũomena jaicoama. Ito bajiri Dios wajana ñama ĩna. Ito bajiro ĩna bajijare, mũa judio masa mejeju tũorũnũsũoa mũa. Judio masa ĩna Diore ãmobitibojarocati, ĩjuama ĩnare ti maiguĩji maji. ĩna ñicusabatiare cũni ti maiñi ĩ. Ito bajiri adi rãmũri gãna judio masare cũni ti maiami ĩ maji. ²⁹ “ĩnare besecu yũ. Ito bajiri ĩnare queno yigũ yigũja yũ”, yiyijũ Dios. ĩ goticãdo bajiroti yigũ yiguĩji ĩ. ĩ goticãdo bajiroti jidicãbicũ yiguĩji Dios. ³⁰ Cajero Diore cũdibisija mũa. Judio masa Diore ĩna cũdibeja ticõri,

m̄ajũare maicõri, m̄are masoñi ï. ³¹ Adocãta judio masa Diore c̄adirã meje ñama. Ito bajiro ña bajibojarocati, m̄are ï ti mairo bajiroti, ija ñnare c̄ani ti maigũ yiguĩji ï. ³² Mani jeyaro Diore c̄adimena riti ñac̄a mani maji. Ñeñaro mani yi ãmoja manire camotabisĩ Dios. Ito bajiro yiñi, ñeñaro mani yija bero, “Buto yũre maisacõguĩji Dios. Ñre yũ ñeñaro yirise yũ goti r̄etobuja, yũre ãcabojogu yiguĩji”, mani yi t̄oĩa masitoni.

³³ Quenasacõa. Quenoguti yigu ñami mani Jac̄a Dios. Jeyaro masigũ ñami ï, ito yicõri jeyaro t̄o masigũ. ï t̄oõarisere masibea mani. Ito yicõri ï yirisere ti masibea mani. ³⁴ Ado bajiro gotia Dios oca tuti: “Ñimũjua Dios ï t̄oõarise t̄oõagũ mami. Ñimũjua Diore riasogu mami. ³⁵ Ñimũjua mami, ‘Diore ïsic̄a yũ. Ito bajiri yũre waja ruyurioami ï’, yigu”. Ito bajiro ucare ñayija jane mejejut̄i. ³⁶ Adi sita ñarotire jeyaro rujeoñi Dios. Ñna suoriti jeyaro ña. Ito yicõri ï ye riti ña. Ito bajiro ï bajijare ñre r̄sc̄ub̄ot̄iñacõr̄j̄a manire. Ito bajiro riti bajit̄iñajaro.

12

Dios ï ãmorise riti mani yija quena, yire gaye

¹ Dios manire ti maicõri jaje mani yerotire yiñi. Ito bajiri yũ ñarã Dios ï ãmorise riti yirã ñaña m̄ua. Quenarise riti yiya, ñeñarise yimenati. M̄ua ito bajiro yija, Dios wan̄a quenagũ yiguĩji m̄ua rãca. Diore mani r̄sc̄ub̄uorise ñre ñorona ito bajiro yir̄j̄a mani. Ito bajiro m̄ua yitoni, oca s̄oro m̄are rotia yũ. ² Diore masimena ña yiro bajiro yibesa. Mame t̄oõare gaye wasoacõri, quenarise riti t̄oõaña m̄ua. Ito bajiro t̄oõacõri Dios ï ãmorise masirã yirãji m̄ua. “Diore quena ña”, yire gaye masirã yirãji m̄ua. Ito yicõri ï wan̄uroti gaye c̄ani masirã yirãji m̄ua. “Iti ña yũre ñasarise”, Dios ye yire gaye masirã yirãji m̄ua.

³ Yũre ti maicõri ã oca mũare gotirocũre yũre cũñi Dios. Ito bajiri ado bajiro mũare gotia yũ. Mani ãre tũorũnrã ñajare manire moare cũñi ã. “ãre yũ moa ãsi masitoni yũre ejabũagu yiguĩji Dios”, mani yi tũoãroca yami Dios. Ito bajiri, “Yũmasi queno Diore moa ãsia yũ”, yi tũoãbitirũja manire. Ado bajirojũa mani tũoãja quena. “Dios ã ejabũarisena riti queno moa masia yũ”, yi tũoãrũja manire. ⁴ Mani ya ruju jaje ña. Tite mũa. Åmo, cajea, gãmorõ, gũbo jaje ña mani ya ruju. Co ruju gaye ricati riti moare cutia mani ya ruju. Tite mũa. Cajeana ti, gãmorõna tũo, ãmona ãmi, gũbona wa ya mani. ⁵ Ito bajiroti bajaia mani Jesucristore tũorũnrã. ãre tũorũnrã ñari ã ya ruju robo bajirã ña mani. Ito bajiri jãjarã ñabõjarãti sũgũre bajiro tũoãcõri gãmeri ejabũa mani. Ito yicõri mani yagu sũgũ ã manija gãmeri godo cutia mani.

⁶ ã ãmorõ bajiro mani jeyarõre, ricati riti mani moa masirotere jidicãñi Dios. Dios manire jidicãre mani moa masirisena ãre queno moa ãsirũja manire. Dios ã oca gotiroti gayere mũare ã jidicãja, Cristore mũa tũorũnrõcõ gotija quena. ⁷ Gãjerãre ejabũare gaye manire Dios ã jidicãja, gãjerãre queno ejabũaja quena. Ito yicõri, no riasore gaye boca ãmigũ gãjerãre queno riasõja quena. ⁸ Gãjerã oca sũorõca yi masigũ, queno yija quena. No gãjerãre ã ãsi ãmoja, queno wanũ quenaro jairo ãsija quena. No rotigũ quenoti rotija quena. No bojõri bũjarãre ejabũagu, wanũ quenare rãca ejabũaja quena.

Cristore tũorũnrã ado bajiro ñaja quena, yire gaye.

⁹ Bũgutĩ gãjerãre mai ruõbesa. Gãjerãre maisaguti maija quena. Ñeñaro yirere ti tecõri jidicãña. Quenarise riti yi ãmoña. ¹⁰ Cristore tũorũnrã ñari sũgũ rãa robo bajiro gãmeri queno ti maiña. Ito bajiro yicõri queno gãmeri rũcũbũõya mũa.

¹¹ Dios moare gaye mware ĩ cūre tuoĭa wanucōri moaja quena. Diore wanurã ĩ ãmoro bajiroti ĩre queno moa ĩsiña mwa.

¹² “Guare queno yigu yiguĭji Dios”, yi tuoĭa yurã ñari, queno wanu quenaro ñaña mwa. Mwa tōbujaja, ñemecutiya. Mware oca ñaja, usiriobeja. Ito yicōri Diore busi jidicãbeja mwa. ĩre mwa busisotija quena.

¹³ Cristore masirã ĩna bojoro bujaja, ĩnare ĩsima. Mwa ya wi ejarãre queno boca ãmima.

¹⁴ Jesure masirã mwa ñajare gãjerã ñeñaro mware ĩna yija, ñeñaro ĩnare busitubeja. Dios ĩnare queno yitoni, Diore senima mwa.

¹⁵ Gãjerã queno ĩna wanu quenaja, queno corocō ĩna rãca wanuma mwa cuni. Gãjerã ĩna bojori bujaja, cocati bojori bujaba mwa cuni.

¹⁶ Gãjerã jeyarore queno ti mai ñaña mwa. “ĩna rēto busaro queno yirã ña mani”, yi tuoĭabesa mwa. “Ñasamena ñama ĩna”, gãjerã yianare cuni baba cuticōri, queno wanu quena ña mwa. “Gãjerã rēto busaro masia yu”, yi tuoĭabesa.

¹⁷ Gãjerã ñeñaro mware ĩna yija, ĩnare gãmebeja mwa. Quenarise riti yiya mwa, gãjerã, “Ñeñaro yirã ñama”, ĩna yibititoni. ¹⁸ Gãjerã rãca gãmeri ti tudibesa mwa. Ado bajirojua mwa yija quena. Queno mwa yi masirise yiya, masa jeyaro rãca queno mwa ñatoni. ¹⁹ Queno tuoĭa yu ñarã mwa. Gãjerã ñeñaro mware ĩna yibojarocati ĩnare ñeñaro yibeja mwa. Mware ñeñaro yirãre ñeñaro ĩna tōbujaroca yi masiami Dios, ĩnaōnare. ĩ oca tutina ado bajiro gotiami Dios: “Yu ña, masa ĩna ñeñaro yire waja, ñeñaro ĩna tōbujaroca yiri masu. ĩna ñeñaro yire waja, ĩnare waja senigũ yigujaja yu”, yiri gotiami mani Uju ĩ oca tutina. ²⁰ Gaje ado bajiro gotia Dios oca: “Mwa wajacu ĩ ñiocōja, ĩre bare ecaya. ĩ idi ãmoja, ĩre ioya. Ito bajiro mwa

yija, m̄ua wajac̄u ñeñaro yi ãmogũ, m̄uare bojobjaja tiḡu yiguĩji”, yi gotia Dios oca tuti. ²¹ Gãjerã ñeñaro m̄uare ñna yibojarocati ñnare ñeñaro yibeja m̄uama. Ñnare quenarise riti yiya m̄ua. Ito bajiro m̄ua yija ticõri, ñna ñeñaro yirisere jidicãrã yirãji gajea.

13

¹ Dioti ñami mani ɸjarãre cõri mas̄u. Dios ï cõana ñajare, mani ɸjarãre yiro robo cõdiruja manire. ² ɸjarãre ti tujabic̄u, ñna rotitoni Dios ï cõanare cõdigũõcũ meje ñami ïocũ. Ito bajiro cõdimenare, ñna tõbujaroca yiḡu yiguĩji Dios. ³ Queno yiri masare güiri masa meje ñama rotiri masa. Ñeñaro yiri masajuare güiri masa ñama rotiri masa. Ito bajiri quenarise riti yiya m̄ua. Quenarise riti m̄ua yija ticõri, m̄uare ti wan̄rã yirãji m̄ua ɸjarã. ⁴ Mani queno ñatoni rotiri masare cũñi Dios. Mani ñeñaro yija, güirã yirãji mani. “Ȳu ñeñaro tõbujaroca yiḡu yiguĩji”, yi t̄uoĩacõri güirã yirãji mani. Ñeñaro yirãre ñna tõbujaroca yironare rotiri masare cũñi Dios. ⁵ Ito bajiri juaji t̄uoĩare gaye t̄uoĩacõri rotiri masare ñna yiro bajiroti cõdirona ñna mani. “Ȳu cõdibeja ticõri, ȳu tõbujaroca yiḡu yiguĩji Dios”, yi t̄uoĩarã cõdija quena. Ito yicõri, “Ȳu cõdija iti ñna queno yire gaye”, yi t̄uoĩacõri, ñna yiro bajiroti cõdiruja manire. ⁶ Rotiri masa ñna moarise yiro robo ñna moaja, Diore yiari moa ïsirã yama ñna. Ito bajiro ñna yitoni ñnare cũñi Dios. Ito bajiri rotiri masa ñna waja senija, ñnare waja yija quena.

⁷ M̄ua waja ruyuriorãre cõni waja yiya. ɸjarã ye niyeru seni ïsiri masare waja yiya. Gaje ɸjarã ñna waja yirotiya, ñna rotiro bajiroti waja yiya. Ito yicõri ñna yiro bajiroti yiya m̄ua. M̄ua ɸjarã ñnarocõreti r̄ucub̄uoya. ⁸ Gãjerãre waja ruyuriobesa. S̄igũre r̄uyabeto gãmeri ti maisotiya. Ito bajiro gãmeri m̄ua ti mairise jidicãbeja m̄ua. No ï t̄u gãnare ti maigũ, Dios ï rotirise cõdiguti ñami ïocũ

ija. ⁹ Dios ĩ rotirise ado bajiro gotia: “Gãji manojore ajebesa. Gãjerãre sĭabesa. Rinibesa. Ito yicõri gãji ya gajeonire ti uobesa”, yi gotia Dios ĩ rotire. Dios ĩ rotirise ñarocõti ado bajiro riti gotia: Gãjerãre mua ti maija, ĩnare ñeñaro yimenaji mua. Ito yicõri ĩnare mua ti maija, Dios ĩ rotirisere cudi jeorã ñarã yirãji mua. Ito bajiri muamasiti mua mairo bajiroti, mua tu gãnare cuni ti maiña. ¹⁰ No ĩ tu gãnare ti maigũ, ĩnare ñeñaro yibicu yiguĩji. Ito bajiri mani tu gãnare mani ti maija, ñarocõti Dios ĩ rotirise cudirã ñarã yirãji mani.

¹¹ Dios ĩ rotiro bajiro riti yiruja manire. Ñamicaju ña ĩja. Nocõ mejeti mani Uju ejagu yiguĩji manire ãmi warocu. Ito bajiri ña yucãruja manire. Cajero ĩ oca mani tuorũnuja, “Co rumu tudi ejagu yiguĩji Jesús”, yi tuoĩacu mani. Ito bajibojarocati adi rumu, “Nocõ mejeti ruja manire ĩ masogũ ejaroto”, yi tuoĩa masia mani ĩja. ¹² Adocãta ñami bajiro baja, masa ñeñaro ĩna yija. Ñami rëta waju, nocõ mejeti mani Uju ĩ tudi ejaroti rumu ejaro yiroja. Itocõti ejagu yiguĩji ĩ. Ito bajiri ñeñaro mani yire gayere jidicãruja manire. Gãjerã rãitĩaroju ñeñaro ĩna yiro bajiro yibitiruja manire. Ado bajiroju yiruja manire. Quenarise riti yiruja, busuro ñarã queno ĩna yiro bajiro. ¹³ Quenarise riti yiruja manire, masa ĩna tiro riojo queno mani yiro bajiro. Basa ĩna meniroju wabitiruja manire. Ñeñaro ĩna ajeroju mecubitiruja manire. Gãji manojore ajebitiruja manire. Mani ya ruju ñeñaro iti tuoĩaro bajiroti ñeñaro yibitiruja manire. Gãjerãre tudibitiruja manire. Gãjerã mani rëtoro ĩna masija ticõri, ĩnare ti junisinibitiruja manire. ¹⁴ Ado bajiroju mani yija quena. Mani Uju Jesu-cristore tuorũnuja manire. ĩti ñami manire ejabuagu, mani ñeñaro yibititoni. Ito bajiri ĩ ejabuarisena mani ya ruju ñeñaro iti tuoĩaro bajiroti yi uyabitiruja manire.

14

Cristore tuorũnrãre busitubesa, yire gaye

¹Queno Jesure tuorũnsabicu ñabojaguti sīgũ mua rãca ĩ ña ãmoja, ĩre boca queno ãmiña mua. “Ito bajiro bajigu ñami”, yi ti masicõri ĩ rãca gãmeri busi tuoĩabeja ñasabitire. ²Ado robojua baja ñasabiti gaye. Coriarã Jesure masirã, “Jeyaro mani baja cuni quena ña”, yi tuoĩama ĩna. Gãjerã queno Jesure masisamenama, “Waibucu ri ba jidicãruja. Ote gaye riti mani baja quena”, yi tuoĩama ĩna. ³Ñarocõti jeyaro barã, gãjerã ba jidicãrãre busitubiticõruja ĩnare. Ito bajiroti ba jidicãrãruja cuni, jeyaro barãre busitubiticõruja. Cristore tuorũncõri, Dios ñarã ñama ĩna ĩja. Ito bajiri ĩnare busiture ma. ⁴Jesure tuorũnrã, Diore moa ĩsiri masa ñama ĩnaõna. ĩna ujarã meje ña mua. Dios ñami ĩna uju. Ito bajiri Dios ĩna uju ñari, “Queno ya mua yure”, ito yicõri, “Queno yibea mua yure”, yiguĩji ĩ. Dios sīgũti ĩre moa ĩsiri masare ĩna queno yitoni yi masiami.

⁵Coriarã Jesure masirã ado bajiro tuoĩama: “Adi rumu Diore rucubwora rumu ñasari rumu ña gaje rumu rëtoro”, yi tuoĩama ĩna. Gãjerãma ado bajiro tuoĩama: “Co rumu ruyabeto corocõ Diore rucubworuja mani”, yi tuoĩama ĩna. Mani jeyaro sīgũ ruyabeto, “Yu yisotire, ñeñarise meje ña”, yi masiruja manire. ⁶Sīgũ, “Adi rumu ña ñasari rumu”, yi tuoĩagũ, ito bajiro yami mani Ujare rucubwogu. Gãji, “Co rumu ruyabeto corocõti ña”, yi tuoĩagũ, ĩ cuni Diore rucubwore gayeti ito bajiro yami. Gãji jeyaro bagu, Diore rucubworecuti bami ĩocũ cuni. ĩ baja, “Queno ya Dios mu”, yiguĩji ĩ. Gãji waibucu ri ĩ ba jidicãja, ito bajiro yami ĩ cuni Diore rucubwogu. “Queno ya Dios mu”, yiguĩji ĩ cuni.

⁷Mani Cristore masirã, mani tuoĩarise riti yi ãmorã meje ña mani. Ito bajiri, “Yu ãmori rumu godacuja yu”,

yimenaji mani. ⁸ Mani catirocõ, mani ʘjũ Cristo ï ãmoro bajiro yirona ña mani. Ito yicõri ï ãmorocõ godarãji mani, ï rãca ñarona. Ito bajiri mani catija cuni, mani godaja cuni Cristo ñarã ña mani. ⁹ Ado robojua baja. Cristo godacõri mɛcana tudĩ catiñi godarã ʘjũ ñarocɔ, ito yicõri catirã ʘjũ ñarocɔ cuni.

¹⁰ ¿No yija gãjerã Jesure masirãre seti yiati mua? ¿No yija gãjerã Jesure masirãre ñeñaro tuoĩa busiati mua? Mani ñarocõti Cristo riojo ñarã yirãji mani, mani queno yigore, mani ñeñaro yigore cuni, ï cõiatoni. Iti masicõri mani ñarãre, “Ïnare seti ña”, yibitiruja manire. ¹¹ Ado bajiro gotia Dios oca tuti:

Catia yũ. Ito bajiri yũ gotirise riti ña. Masa jeyaro yũ riojo, rijomunigãna ñini rũjũrã yirãji, yũre rũcũbũorona. Sĩgũ ruyabeto, “Dios ña mũ”, yirã yirãji, yi gotia Dios oca tuti.

¹² Iti tuocõri, “Mani jeyaro sũgũ ruyabeto, jeyaro mani yigorore Diore goti rẽtorã yirãji mani”, yi tuoĩa mani.

Cristore tuorũnurãre ñna jidicãroca yibesa, yire gaye

¹³ Ito bajiri gãmeri busitubiticõruja manire. Ado bajirojua quenarise riti yiruja manire. Ito yicõri mani rãca gãna Cristore masirã, ñna ñeñaro yiroca yimenaji mani.

¹⁴ Yũama Cristore masigũ ñari, “Jeyaro yũ baja quena ña”, yi tuoĩa yũ. “Iti yũ baja, ñeñarise ña”, yi tuoĩabojaguti ï baja, ñeñaro yigũ yami ïocũ. ¹⁵ Sũgũ Cristore masigũ, “Rẽore gaye ña”, ï yi tuoĩarise mani baja ticõri, bojori bũjagũ yiguĩji gajea. Ito bajiri ï bojori bũjaroca mani yija, ïre ti mairã meje ña mani. Ïnaõnare yiarĩ cuni goda ïsiñi Cristo. Ito bajiri sũgũ Cristore masigũ mani baja ticõri, Cristore ï jidicã ãmoja, babiticõruja itire. ¹⁶ “Gũa yirise quena ña”, yi mua tuoĩabojarocati, “Ñeñaro yama ñna”, yi gãjerã muare ñna busituja, yibeja itire. ¹⁷ Ïre tuorũnurãre riti ï rotirojũ miojugũ yiguĩji Dios. Ito bajiri mani barise

cuni, mani idirise cuni ñasarise meje ña. Mani ʘju ĩ rotiro bajiro mani cudiya, iti ña ñasarise. Ito yicōri gājerã rãca queno mani ñaja, iti ña ñasarise. Espiritu Santo mani wanu quenaroca ĩ yija, iti cuni ñasarise ña. ¹⁸ Cristo ĩ amoro bajiroti mani yija, “Queno yirã ñama ĩna”, yigu yiguĭji Dios. Ito yicōri masa cuni ito bajiroti yirã yirãji.

¹⁹ Ito bajiro yiruja mani, gājerã rãca ñe oca manoti queno mani ñatoni. Ito yicōri gāmeri ejabuato mani, Cristore bato busa tuorũnũana yirona. ²⁰ Sigũ, “Rẽore gaye bama ĩna”, yi wacu Diore ĩ jidicã amoja, babitiruja mani. Bare jeyaro mani baja quenarise ñaroja. Ito bajibojarocati gāji, “Rẽore ña iti”, yi wacu, mani baja ticōri, Cristore ĩ jidicã amoja, babitiruja mani itire. ²¹ Gāji Cristore masigũ, rẽore gaye mani baja ticōri, ito yicōri uyé ide mani idija ticōri, Cristore jidicãgũ yiguĭji gajea. Ito bajiri Cristore ĩ jidicãbititoni, jeyaro rẽore gaye babitiruja manire. Ito yicōri idire idibitiruja manire. Mani yirise ticōri, Cristore ĩ jidicã amoja, yibitiruja mani itire. ²² “Jeyaro yu baja quenaroja”, mani yi tuoĭaja, Diore riti gotija quena. No, “Yu yisotirise quena ña Dios ĩ tiro riojo”, yi masigũ, wanu quenagũ ñami ĩocũ. ²³ No, “Yu baja quenabetoja iti”, yi masibojaguti, ĩ baja, seti ñaroja ĩre. “Yu baja quenabetoja gajea”, yibojaguti, ĩ bajare seti ñaroja ĩre. “Yu yija quenabetoja gajea”, yibojarãti, mani yija, seti ñaroja manire.

15

Mani ñaroti gaye riti meje tuoĭaja quena, yire gaye

¹ Mani Diore queno tuorũnrã, gājerã queno Diore tuorũnusamenare ejabuaruja manire, ñeñaro ĩna yibititoni. “Rẽore ña”, ĩna yi tuoĭare gaye yibiticõruja mani. Ito yicōri mani wanuroti gaye riti yibitiruja manire. ² Ado bajirojua yiruja manire. Mani tu ñarãre ĩna wanu quenaroca

yiruja manire. Ito yicōri ñnare queno yiruja mani, Diore bato busa ñna tuorūnūtoni. ³ Cristo cuni ĩ rioti ĩ wanuroti gayere yibisĩ ĩ. Ado robojua bajiyija. Dios oca tuti ucare bajiroti rētayija. Ado bajiro yiyijū Cristo, ĩ Jacure: “Jeyaro ñeñarise mure ñna busigoreti, yure rētacu ĩja”, yi ucare ñayija jane mejejutĩ. ⁴ Jane mejeju Dios ĩ busigore ucare ñayija. Quenarisejua mani yi riasotitoni bajiyija iti. Ito bajiri itire mani riasotija, ñeñaro tōbujabobarāti usiriomenati ñemecuticōrāji mani. Ito yicōri queno wanu quenarā yirāji mani. “Dios ĩ goticādo bajiroti jeyaro rētarō yiroja”, yi tuoña yucōri, queno wanu quenarā yirāji mani. ⁵ Dios ñami mani ñemecutiroca yigu, ito yicōri mani tuoña oca seoroca yigu. Sīgure bajiro mua tuoña wanuroca yijaro ĩ, Cristo ĩ āmoro bajiro. ⁶ Mani Ūju Jesucristo Jacu Diore mua rūcubūotoni, ito bajiro yijaro Dios mure. Ito yicōri sīgure bajiro usi cuticōri, “ĩ ñami rētoro masigū”, mua yi tuoñatoni, ito bajiro yijaro Dios mure.

Judio masa meje cuni Pablo Cristo oca ĩ gotire gaye

⁷ Cristo manire ĩ boca āmiado bajiroti, gājerāre boca āmiña mua cuni. Ito bajiro mua yija, masa mure tirā riti, “Queno yigu ñami Dios”, yirā yirāji ñna. ⁸ “Adi macārucūrojure judio masare ejabūagu wadiñi Cristo”, ya yu mure. Ito bajiro yini Cristo, “Jane mejeju gānare Dios ĩ goticādo bajiroti yini”, mani yi masitoni. ⁹ Gaje ado bajiro wadiñi Cristo. “Masare ti maigū ñari rētoro queno yigu ñami Dios”, judio masa meje cuni ñna yi masitoni, ado wadiñi Cristo. Dios oca tuti iti gotiado bajiroti ado bajiro gotiñi Cristo Diore:

Judio masa meje tuoro riojo, “Mu ña rētoro masigū”, yi mure rūcubūogu yiguja yu. Mure rūcubūogu mu wame basa seacuja yu, yiyijū Cristo Diore. Ito bajiro yi ucare ñayija jane mejejutĩ.

¹⁰ Ito yicōri gaje ado bajiro ucare ña:

Mua judio masa meje cuni, Dios ñarã judio masa rãca wanu quena ña mua, yiari ucare ñayija.

¹¹ Ito yicõri ado bajiro ucare ñayija gaje:

Judio masa meje, ito yicõri masa jeyaro, “Rẽtoro queno masigũ ñami Dios, ito yicõri rẽtoro queno yigu ñami Dios”, yi rucubũojaro ñna, yi ucare ñayija.

¹² Isaías ñayoru ado bajiro ucañi:

Isaí ñayoru janerãbatia janami sigũ rujeagu yiguñji. Judio masa meje yu ñagũ yiguñji ñ. Ñre tuorũnucõri, “Manire masogũ yiguñji”, yirã yirãji ñna, yi ucare ñayija.

¹³ “Dioti ñami manire masorocu”, yi tuoña mani. Ñre senia yu, mua ñre tuorũnucõri queno corocõ mua wanu quenatoni, ito yicõri queno corocõ mua ñatoni. Gaje ñre senia yu. “Espiritu Santona suoriti manire masogũ yiguñji”, yi mua tuoña wanutoni Diore senia yu.

¹⁴ Yu ñarã, queno yirã ña mua, ito yicõri Cristo gayere queno masirã ña mua. Ito bajiri gãmeri riaso masia mua. Yi tuoñasacõa yu itire. ¹⁵ Ito bajilbojarocati adi paperana muare oca sã busaro gotia yu. Ito bajiro muare ya yu, mua tuogore mua tuo bujatoni, ito yicõri mua acabojabititoni. Sõoro muare papera cõa yu, Dios yure ti maicõri ito bajiro ñ cũjare. ¹⁶ Mua judio masa mejere cuni Cristo oca quenarise riasotoni yure cũñi Dios. Cristore tuorũnũjaro ñna, yirocu muare riasocu yu. Adocãta ñre tuorũnũrã ñari Espiritu Santona suoriti Dios ñarã ña mua ñja. Ito bajiri queno wanu quenacõri muare boca amigũ yiguñji Dios. Itire tuoñagũ muare riasoa yu.

¹⁷ Jesucristore tuorũnucõri Diore moa ñsia yu. Ito bajiri wanu quenacõri, “Jesucristo ñ ejabuarisena Diore queno moa ñsia yu”, yi tuoña yu. ¹⁸⁻¹⁹ Iti riti muare gotia yu. Yure ejabuañi Cristo, mua judio masa mejere cuni ñre mua cãdiroca yu yitoni. Yu riasore gaye tuocõri, queno

yũ yire gaye ticõri, ito yicõri Espõritu Santona sũoriti tiyamani yũ yija ticõri, Cristore tuorũnyija mua ãja. Naro bajiroti Cristo oca quenarise riasocũ yũ. Jerusalenjuna yũ goti wadija, gaje cutori jeyaro goticõri, Iliriaju goti ejacũ yũ itire. ²⁰ Cristo gaye ãna tuoĩamena ñaroju, Cristo masare ã masore gaye ãnare riasogu wasoticũ yũ. Gãjerã ãna riasocãdojure, riasogu wa ãmobicicũ yũ. ²¹ Ito bajiro yũ yija, Dios oca tuti iti ucado bajiroti bajicũ. Ado bajiro gotia:

Ã oca tuobitiana tuorã yirãji. Ito yicõri tuo rõtoburã yirãji, yi ucare ñayija.

Romaju Pablo ã wa ãmore gaye

²² Jaje cutori yũ riaso ucure ñajare mua tu wa ãmobjaguti wa masibiticũ yũ maji. ²³ Adi sitajure moare tũocoa yũ ãja. Canũ meje mua tu wa ãmobjaguti, wa masibiticũ yũ maji. Ito bajiri adocãta mua tu wacũ ya yũ ãja. ²⁴ Espaãaju wacũ, muare ti rãta wacũ yiguja yũ. Mua rãca yũ wanũ quenaja bero yure mua ejabuare ãmoa yũ, Espaãa yũ eja masitoni. ²⁵ Ito bajibojarocati cajero Jerusalenju wacũ ya yũ maji, Cristore tuorũnuri masare niyeru ãmi wacũ. ²⁶ Macedonia sita gãna, ito yicõri Acaya sita gãna cuni, ado bajiro tuoĩayijarã ãna: “Jerusalen gãna Jesure masirã, bojoro bujarã yirãji coriarã. Ito bajiri niyeruna ãnare ejabuaruja mani”, yi tuoĩayijarã ãna. Niyeru miojucõri yure ãsicã ãna. Ito bajiri iti niyeru Jerusalen gãnare ãsigũ wacũ ya yũ. ²⁷ Macedonia sita gãna, ito yicõri Acaya sita gãna, judio masa meje ñabojarãti, “Jerusalen gãna judio masare, ãnare ejabuaruja mani”, yi tuoĩayijarã ãna. Cajero maji judio masa mejere cuni Dios masare ã masore gaye riasoyijarã judio masa maji. Ito bajiri adocãta judio masa meje ñarã judio masa bojoro bujarãre, ejabuaja quena. ²⁸ Jerusalen gãna Jesure masirãre iti niyeru yũ ãsija bero, Espaãaju wacũ muare ti rãta wacũ yiguja yũ. ²⁹ Mua

tũ ejacõri Cristo gayere yũ riasoja, mũa wanũroca yigũ yiguĩji Cristo.

³⁰ Yũ ñarã Cristore tuorũnurã ña mũa. Ito yicõri Espiritu Santona suoriti gãmeri ti maia mũa. Ito bajiri yũre yiari Diore mũa senitoni muare usirio codea yũ.

³¹ Judea gãna Jesure masimena yũre ñeñaro ñna yibititoni, Diore busi ñsiña mũa, yũre yiari. Ito yicõri gaje ado bajiro Diore seniña, Jerusalén gãna Cristore masirã, buto wanũ quenacõri, yũ niyeru ãmi warise ñna boca ãmitoni. ³² Ito bajiro yũre yiari mũa busi ñsija, Dios ñ amorõ bajiroti mũa tũ wanũ ejagũ yigũja yũ. Ito yicõri queno usi cuticõri gãmeri ejabũarã yirãji mani. ³³ Mani sajari oca cutiroca yigũ ñami Dios. Mũa rãca ñatĩñajaro Dios, ya yũ. Ito bajiro riti bajitĩñajaro.

16

Quenajaro masa, Pablo ñ yi ñucare gaye

¹ Mani yago Febe wame cutigo mu tũ ejago yigõji. Queno yigo ñamo iso. Cencrea wame cutiri cutõ gãna Jesure masirã rãca Diore yiari moa ñsiri maso ñamo iso.

² Jãjarãre ejabũañi iso. Ito yicõri yũre cũini ejabũacõ iso. Mani Hjure tuo mairã ñari, isore queno boca ãmima mũa. Mani Cristore masirã ñari, gãjerã Cristore masirãre mani gãmeri boca ãmija quena. Ito bajiri isore boca ãmicõri, jeyaro mũa ejabũarocõ isore ejabũaba.

³ Quenajaro Aquila, ito yicõri ñ manojo Priscila cũini. Jesucristo gaye yũ riasotoni, queno yũre ejabũacã ñna.

⁴ Yũre gãjerã sĩa amorã ñna josaja, yũre ejabũabojari godacobocã ñna. Ito bajiri, “Quenoguti yicã ñna”, ya yũ ñnare. Yũ sīgũ meje, “Queno yicã”, ya yũ. Judio masa meje cũini Cristore masirã, ito bajiroti yama ñna cũini. ⁵ Quenajaro, Diore rãcubũorona Aquila ya wi minijuarã. Quenajaro yũ rãca gagũ yũ baba, Epeneto cũini. Ñ ñami cajero Asia

sita gagu Cristore tuorũnũsũorũ. ⁶ Quenajaro mani yago María cuni. Yoari mua rãca moañi iso. ⁷ Gua comasi ñarã cuni, Andrónico, ito yicõri Junias cuni, Quenajaro. Ìna rãca tubiara wijũ ñacu gua. Ito yicõri yũ riojua busa Cristore tuorũnũsũoñi ñna. “Queno yirã ñama Andrónico, ito yicõri Junias cuni”, yama Cristo ï cũana.

⁸ Quenajaro yũ baba Ampliato cuni. Mani Uju yagu ï ñajare buto ïre maia yũ. ⁹ Quenajaro Urbano cuni. Mani rãca Cristore moa ïsigũ ñami ï. Quenajaro yũ baba yũ maigũ Estaquis cuni. ¹⁰ Quenajaro Apeles cuni. Jeyaro ï moagore ticõri, “Cristore queno tuorũnũgũ ñami ï”, yi tuoña mani. Quenajaro Aristóbulo cuni, ï ya wi gãna ñarocõti. ¹¹ Quenajaro gua comasi, Herodiõn cuni. Quenajaro Narciso cuni, ï ya wi gãna ñarocõ Cristore masirã cuni. ¹² Quenajaro Trifena, ito yicõri Trifosa cuni. Ìna romia jũarã ruje moacã mani Uju Jesure yiari. Quenajaro mani yago Pársida cuni. Iso cuni ruje mani Ujũre yiari moacõ. ¹³ Quenajaro Rufo cuni. Masa jeyaro, “Buto Cristore tuorũnũgũ ñami ï”, yama ñna. Quenajaro ï jaco. Yũ jacoõcõti ñamo iso cuni yure. ¹⁴ Quenajaro Asíncrito, Flegonte cuni, Hermas cuni, Patrobas cuni, Hermes cuni. Ito yicõri ñna rãca Cristore tuorũnũrã ñnacõti quenajaro. ¹⁵ Quenajaro Filólogo, Julia cuni, Nereo cuni, ito yicõri ï ocabajio cuni, Olimpás cuni. Ito yicõri ñna rãca Cristore tuorũnũrã ñnacõti quenajaro.

¹⁶ Mani comasi Cristore masirãre queno wanũcõri gãmeri boca ãmima mua. Cristore tuorũnũrã ñarocõti, “Quenajaro”, yama mũare.

¹⁷ Yũ ñarã ado bajiro gaje mũare gotigu ya yũ. Coriarã ñama masa batatoni oca menirã. Ito yicõri Jesús gayere ñna riasoja, mua tuogore bajiro meje riasoama ñna. Ìnare mua tuoja, “Roya”, yirocu mũare gotia yũ. Ìnare camotadiya mua. ¹⁸ Mani Uju Cristore yiari meje moama ñna.

Ĩna tuoĩaro bajiroti yama ĩna. ĩna busija, burōti quenarise bajiro ruyua. Quenarise meje ĩa iti. Ito bajiri queno tuo masimena ĩna busirisere tuorũnubojama ĩna. ¹⁹ “Dios oca queno cadirã ĩama ĩna”, yama masa jeyaro mũare. Ito bajiri mũare wanũa yũ. Quenarise gaye riti mũa yire ãmoa yũ. Ito yicōri kojireã ñeñarise mũa yimena ñare ãmoa yũ. ²⁰ Dioti ĩami mani queno corocō ñaroca yigũ. Nocō mejeti rũmũa ɥjũ Satanásre mũa rētocũroca yigũ yiguĩji Dios mũare. Mani Ʋjũ Jesucristo queno mũare yijaro.

²¹ Yũ rãca moagũ Timoteo, “Quenajaro”, yami mũare. Ito yicōri gũa comasi Lucio, Jasón cuni ito yicōri Sosípater, “Quenajaro”, yama ĩna mũare.

²² Yũ Tercio, Pablo ĩ rotiro bajiro adi papera menia. Yũ Jesure masigũ ñari, mũa Jesure masirãre, “Quenajaro”, ya yũ.

²³ Gayo cuni, “Quenajaro”, yami mũare. ĩ rãca ĩ ya wijũ ña yũ. Ado ĩ ya wijũ Jesure masirã minijuasotiamã ĩna. ĩna cuni, “Quenajaro”, yama mũare. Ito yicōri Erasto, adi cuto gagũ niyeru seori masũ, “Quenajaro”, yami mũare. Ito yicōri mani rãca gagũ Cristore masigũ Cuarto wame cutigũ “Quenajaro”, yami mũare.

²⁴ Mani Ʋjũ Jesucristo, mũa ñarocō jeyarore queno mũa ñaroca yijaro. Ito bajiro riti bajitĩñajaro.

Diore rũcubũorũja manire, Pablo ĩ yisusare gaye

²⁵ Diore rũcubũorã ñari, “Queno yigũ ĩami ĩ. Rētoro masigũ ĩami ĩ”, Diore yi rũcubũorũja mani. ĩ ocare queno mũa tuorũnũja, mũa tuoĩa oca sēoroca yi masiguĩji Dios. Iti oca ña, Cristo masare ĩ masore gaye, yũ riasorise. Cajerojuti jane mejejũ masare riasore meje ñayija iti. ²⁶ Ito bajibojarocati adocãta masirãji masa itire, Dios oca gotiri masa itire ĩna ucajare. Masa jeyaro iti oca tuorũnucōri ĩna cuditoni, Dios catitĩñagũ, iti oca riasore gaye cõañi.

²⁷ Jesucristore tuorũnurã ñari, “Buto masigũ ñami Dios. Ñ sīgũti ñami jeyaro masigũ”, yi rũcũbuotĩñarũja manire. Itocõ ña.

Dios Oca Tuti New Testament in Macuna

copyright © 2012 Wycliffe Bible Translators, Inc.

Language: Macuna

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Macuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06
